

1 कुरेंति

कुरेंति विस्वासुल्कुंक पौलुसना मोदाटा सिट्टि

इद सिट्टिटा बारेमते गिचचो परिचयम

रासतोना पोरोल: पौलुस

रासता कालम: इसवि सन 56

कुरेंति सहरता विस्वासुल्कुनाहाटीं इपीसि सहरताल प्रेरित पौलुस इद सिट्टि रासतोर. किरिस्तुना बेसता कबुर वेहालय रोंडो मल्का वातस्के, ई कुरेंति सहरते कलिसिया सुख कीतोर. अगा कोन्नि रोजकु मंचि अगटाल होत्ता पजा, अद कलिसियाते वेल्लेने समस्यां तयार आतां. अव समस्यांकु समादान वेहालय कुरेंति सहरता विस्वासुल्कुंक इद मोदाटा सिट्टि रासतोर. आ कलिसियातोकुंक वरोनद-वरोक अर्काकोटा आयमळ, पापम कबळ कियमळ इल्हा जर्गसेक मत्ता. इवन्निटवुंक समादानम बेसता कबुरता हेंदाले दोर्का परता इंचि पौलुस रासतोर.

मनम किरिस्तुना मनकालोर्कुम इंचि वट्टिदे मनानायो, गानि किरिस्तुनलेसी ताकाना, पवित्र मनमळते बेस्सेके होंदना, वरोक-वरोर पावरम कियमळे पेद्दा पोल्ले आंद, इंचि रासतोर.

बगा बतल मंता

जोहार आनि परिचयम **1:1-9**

कलिसियाते वरोनद वरोक अर्काकोटा आयमळ **1:10-4:21**

कुटुंबते कलियसि पिसमळ **5:1-7:40**

किरिस्तुनोर आनि बोम्मांक मोळ्कानोर **8:1-11:1**

कलिसियाते कलियसि पिसमळ आनि आरादना **11:2-14:40**

किरिस्तु आनि ओना विस्वासुल्क मर्ग जीवाते तेदमळ **15:1-58**

यहुदियाता विस्वासुल्कुनाहाटीं चंदा जमा कियमळ **16:1-4**

सतता बारेमते आनि आकिर बोदा **16:5-24**

जोहर

1 नना पौलसुन, किरिस्तु येसुना प्रेरित आयालय पेन नाकुन दाना मनसुनाल केयता. नावा आनि सोस्तिनेस दादानाहेंदाल जोहर.*

2 कुरेंति सहरते मनानोर किरिस्तु येसुनलोप्पो पवित्र आता पेनदा कलिसियातोरुक्क, आनि वें-वें जेगाने मना सामि इत्ते, ओरा आनि मना येसु किरिस्तुना पोरोलते आरादना कियाना अंटोर बक्तुलकुंक रासता सिट्टि,

3 मना पेनबाबाल आनि सामि येसु किरिस्तुनाहेंदाल कुर्पा, सांति दोर्कसेक मन्किांटी.

पौलस पेनदुन दन्यवाद कीतोर

4 किरिस्तु येसुनलोप्पो मीक पेन हीता कुर्पाताहाटीं, नना पेनदुन बस्केळक दन्यवाद कीतन.

5-6 किरिस्तुना गवाइ मीलोप्पो गट्टिगा मत्ता इंचि, मिमेट अन्नि तीस्कुने वळ्कुमळते आनि बुद्धिदते निडिस होत्तिर.

7 अदुनहाटीं मिमेट पेनदा बद्दे आत्माता वरमते तक्को हिल्लिर, मिमेट मना सामि येसु किरिस्तु मर्रा वायानद एदुर हळसेक मतिर.

8 सामि येसु किरिस्तु मर्रा वायाना रोजुने मिमेट दोसेम हिलाकोंटा मंदना इंचि पेन मीकुन आकिरदाका गट्टिगा ईरता.

9 पेन विस्वासम लायकतद आंद. अद दाना मर्रि मना सामि येसु किरिस्तुनतोनि कूळसि मनालय मीकुन केयता.

विस्वासुलकुंक वरोनद-वरोक अर्काकोंटा आयमळ

10-11 विस्वासुलकुनिटा! मीलोप्पो जगडाल्क आसेक मंतां इंचि क्लोयेना लोतोर नाक वेहतुर. अदुनहाटीं मिमेट अंटोर उंदे पोल्लेते ताकाटु, मीलोप्पो वरोनद-वरोक अर्काकोंटा मनमट, गानि मिमेट उंदे मनसुने, उंदे विचारमते कलियसि मंटु इंचि नना मीक मना सामि येसु किरिस्तुना पोरोलते विनति कीसेक मंतन.

12 नना वेहना पोल्ले इदे गदा, मीवटेताल वरोर, “नना पौलसनोन आंदुन,” इंकावरोर, “नना अप्पुलोसनोन आंदुन,” इंकावरोर, “नना केपानोन आंदुन,” इंकावरोर, “नना किरिस्तुनोन आंदुन,” इंचि इतिर.

13 बतल, किरिस्तुन तूसुक कीतिरा? पौलस कूसुनपोर्रो मीवाहाटीं जीवा हीतोर? हिलाकोंटे पौलसुना पोरोलते मिमेट बापतिस्मा एततिरा?

* 1:1 इद सिट्टि पौलस रासतोर, गानि सोस्तिनेस सिराप जोहर वेहतोर.

14 नना मिहागटाल क्रिसपुसुंक आनि गयुसुंके बापतिस्मा हीतन, बेस आता ओर्क आयाका बोनके हिया हिल्लेन, पेनदुक दन्यवाद कीतन.

15 हिलाकोटे नावा पोरोलतेन बापतिस्मा एततिर इंचि बोरेन्ना इंचि मननेर.

16 नना स्टिपनसना लोतोर्कगुडा बापतिस्मा हीतन, ईर आयाका इंका बोर्कन्ना नना हीतना, नाक एर्का हिल्ले.

17 बारित्ते किरिस्तु नाकुन बापतिस्मा हियालय लोहा हिल्लोर, गानि बेसता कबुरतुन वेहालय लोहतोर. अदगुडा मनकना बुद्धि मत्ताप आयो, अल्हा वेहानय्ते किरिस्तु कूसुनपोर्ो हाता ताकततद अर्तम मनो.

पेनदा ताकत आनि तेल्वि किरिस्तु आंदुर

18 कूसता पोल्ले वेहमळ इत्ते नासडेम आयानोराहाटीं मुर्कतनम आंदु, गानि पेन मनाकुन पिसागोटता, अदुनहाटीं पेनदा पोल्ले मनाकु बलम आंदु.

19 इदुना बारेमते, दर्मसास्त्रमते इल्हा रासि मंता,
“तेल्विगल्लोर्कुना तेल्वितुन नासडेम कीतन,
उसारगल्लोर्कुना उसारतनमतुन पास्कंतन.” ☆

20 अय्ते, बगा मंतोर तेल्विगल्लोड? बगा मंतुर दर्मसास्त्रम कराहना गुस्लक? ई दुनियाता वाद-विवाद कियानोर बगा मंतुर? इद दुनियातोर तेल्वि पेनदा मुन्ने मुर्कतनम आंद.

21 बारित्ते, पेनदा तेल्वितुन, दुनियाता लोकुलक ओरा सतता तेल्विते पेनदुन एपाट किया हिल्लुर. मोमोट बदाय्ते मुर्कतनमता कबुर वेहंतोमो, अदुना हेंदाल विस्वासम कीतोर्क मुक्ति दोर्कना, इदे पेनदुक बेस अनपिच्चंता.

22 बारित्ते यहुदिल्क अय्ते चिन्हां गावाले इंतुर, युनानि लोकुलक बारे तेल्वि पहकंतुर.

23 गानि मोमोट अय्ते कूसुनपोर्ो हाता किरिस्तुना पोल्लें वेहंतोम. इद यहुदिल्कुं विस्वासम किया परवसोंटा पोल्ले आंद. आनि यहुदि आयवोर्कुं मुर्कतनमतसोंटा पोल्ले आंद.

24 गानि पेन बोर्कुन अय्ते केयता, ओर यहुदिल्क आयिर, युनानिर आयिर, ओराहाटीं पेनदा ताकत, पेनदा तेल्वि किरिस्तु आंदुर.

25 बारित्ते पेनदा मुर्कतनम इत्ते, मनकालोर्कुना तेल्विकन्ना वेल्ले तेल्वितद आंद, पेनदा ताकत कमजोर इत्ते, मनकालोर्कुकन्ना वेल्ले बलमतद आंद.

26 विस्वासुल्कुनिटा! विचारम कीम्पु, दुनियाता लेक्काते मिमेट तेल्चितोर आयिर, एक्को बलमतोर आयिर, पेद्दा लोतोर आयिर, अय्नागानि पेन मीकुन केयता.

27 बुद्धि मत्तोर्कुं सिग्गु वायालय दुनियाते बुद्धि हिल्वोर्कुं पेन पेरता. बलमता मनकालोर्कुं सिग्गु वायालय, दुनियाते बलम हिल्वोर्कुं पेन पेरता.

28-29 पेनदा मुन्ने बोरे मनकल पेद्दिदेर्केम कियामान्नि इंचि दुनियाते बतले हिल्वोर्कुं, हय्सवोर्कुं, बतले कबळक ओज्जुवोर्कुं, पेन पेरता.

30 पेनदाहेंदाले येसु किरिस्तुनलोप्पो मीवा पिस्वर मंता, किरिस्तुनाहेंदाल मनाकु तेल्चि, नीति, पवित्र आतोम आनि पापमता सिक्साताल पिसतोम.

31 अदुनहाटी, “पेद्दिदेर्केम कियानोर बोरे आयिर, सामि ओनाहाटी बतलथ्ते कीतोरो, अव्ते ओर पेद्दिदेर्केम कियागोम,” इंचि दर्मसास्त्रमते रासि मंता.

2

कूसुनपोर्गेटा किरिस्तुना बारेमते बेसता कबुर

1 विस्वासुल्कुनिटा! नना मिहगा वातस्के, नावा पेद्दा पोल्लेने हिलाकोटे पेद्दा तेल्चिते पेनदा बारेमते गवाइ वेहा हिल्लेन.

2 गानि नना मीवा नड्डुम मननेके कूसुंक वेलाड वाटता येसु किरिस्तु आयाका इंका वेरे बद्दे पोल्ले वळकोन इंचि निरनायम कीसि मत्तन.

3 नना मिहगा मननेके मेंदुल्ले कमजोर आसि मत्तन. वेल्ले वेरेंते वनुकसेके मत्तन.

4 नावा वळकमळ आनि नना वेहता कबुर, नावा तेल्चिता पोल्लेने मनाहिल्ले, गानि पेनदा आत्मा आनि ताकतते निंडसि मत्ता.

5 अदुनहाटी मीवा विस्वासम मनकालोर्कुना तेल्चि परकारम आयो गानि पेनदा ताकत परकारम मनागोम.

पेनदा तेल्चि

6 मोमोट इद दुनियाता हिलाकोटे इद दुनियाते नासडेम आयाना अदिकारिल्कुना तेल्चि वेहोम, गानि विस्वासमते गट्टिगा मत्तोर्कुंके तेल्चि वेहंतोम.

7 मोमोट मर्ममते मक्किचि मत्ता पेनदा तेल्चितुन वेहंतोम, अद बूमि पुट्टका मुन्नेने मावा पेद्दातनमहाटी पेन तयार कीसि इरता.

8 ई तेल्विता बारेमते दुनियाता अदिकारिल्लुकुं बोरें तेळिया हिल्ले, ओर्क गिंटा तेळियसि मत्ते, महिमागल्ला सामि येसु किरिस्तुन कृसुनपोरें मोल्लां कोहका कोन्नेर.

9 गानि दर्मसास्त्रमते,

“कळकुने बोरे हळवव, केळकुने बोरे केंजवव,

बोरा मनसुने वायवव पोल्लें, दानपोरें पावरम कियानोराहाटी पेन तयार कीसि इर्ता,”

इंचि रासि मंता.☆

10 गानि पेन दाना आत्माताहेंदाल अवुन मनाकु हुपिस्ता. बारित्ते अद आत्माकु अन्नि एरपाटे, पेनदा मर्ममगुडा एरपाटे.

11 वरोर मनकना विचाराल्क मनकना आत्मा आयाका इंका बोर एरपाट कीतोरे? अल्हेने पेनदा विचाराल्क पेनदा आत्मा आयाका इंका बोरे एरपाट किय्योर.

12 इंदके मनाकु दुनियाता आत्मा दोर्काहिल्ले, पेन हीता पोल्लें तेळियालय पेनदा आत्मा मनाकु दोर्कता.

13 माक इव पोल्लें मनकना तेल्विते कराहतव आयों गानि पेनदा आत्माते कराहतव आंदुं. अवे पोल्लेन मीक तेळियागोदिस वेहंतोम.

14 बोनगा अय्ते पेनदा आत्मा हिल्ले ओर पेनदा आत्माता पोल्लेन ओप्कुन्नोर. ओनकु अव मुर्क पोल्लें अनपिच्चंतां. बारित्ते अव पोल्लें पेनदा आत्मातेने तेळिया परांतां, अदुनहाटी ओनकु तेळिया परें.

15 बोनगा अय्ते पेनदा आत्मा मंता, ओर अन्निन अर्तम किया परांतोर, गानि ओना बारेमते वेंरे मनकल बोरे अर्तम किया परेंर.

16 इदुन बारेमते,

“सामिना मनसु बोनकु तेळियंता, ओनकु बोर करहा परांतुर?

गानि किरिस्तुना मनसु मनागा मंता,

इंचि दर्मसास्त्रमते रासि मंता.”☆

3

पेनदा दासुल्लकुना विचारम अलग-अलग मंदनायो

1 विस्वासुल्कुनिटा! पेनदा आत्मा मत्तोर्कुनतोनि वळकताप मीवातोनि वळका परीहिल्लेन. पेनदा आत्मा हिल्ला दुनियातोरलेसीं आनि किरिस्तुनलोप्पो इंदकेगुडा पिलाल्कुनसंटोरे इंचि मीवातोनि वळकतन.

2 नना मीक पाल उहतन, गाटो तिहा हिल्लेन; बारित्ते मिमेट गाटो तिना पराकौंदिर, गानि इंदकेगुडा मिमेट गाटो तिना परानालायक हिल्लिर.

3 बारित्ते इंदकेगुडा मिमेट मेंदुल्ला इच्चा मत्तापे ताकसेक मंतिट. इंकावरोना पोर्रो कळक पोत्तना, जगडाल्क कियाना गुनम मंता. अय्ते मिमेट मनकना इच्चाते ताकानोर आयिरा? दुनियाता लोकुल्कुनालेसीं ताकसेक हिल्लिरा?

4 मिहगटाल वरोर, “नना पौलुसनोन आंदुन”, इंकावरोर, “नना अप्पुलोसनोन आंदुन” इंचि इतिर. इल्हा मिमेट दुनियातोरलेसीं पेनदुन एरपाट कियवोर आतिरा बतला?

5 अप्पुलोस बोर आंदुर? नना पौलुसुन बोन आंदुन? मोमोट इव्वुरमगुडा पेनदा सेवाकुल्कुमे. पेन माक बतल अय्ते कबळ अप्पजेपता, अदुन वेहतोम, मिमेट विस्वासम कीतिर.

6 नना पेळे वाटतन, अप्पुलोस एर दोस्तोर, गानि दान बेर्सागोटनद पेने आंदु.

7 इत्ते, पेळे वाटनोर आयिर, एर दोस्सानोर आयिर ईर पेद्दोर आयुर, गानि दान बेर्सागोटनद पेने पेद्देदि आंदु.

8 वरोर वाटतोर, वरोर एर दोस्तोर, इल्हा ओरा-ओरा कबळता इसाबते ओर्क बूति दोर्कार.

9 मोमोट पेनतोनि कलियसि कबळ कियानोर्कुम आंदुम, मिमेट पेनदा नेलितसंटोर, पेनदा लोतसंटोर आंदिर.

10 नाक पेन हीता कुर्पाहिंदाल, वरोर बेसता मिस्त्रिनलेसीं पुनादि दोहतन, दानपोर्रो इंकावरोर रद्दा दोस्सेक मंतोर, इल्हा वरोर-वरोर दानपोर्रो दोस्सानोर बल्हा रद्दा दोस्सेक मंतोर, ओर बेस हळसि दोसना.

11 येसु किरिस्ते पुनादि आंदुर. ओर दोहता पुनादि आयाका, इंका बोरे वेंरे पुनादि दोहा पर्र.

12 बोरन्नागिटा बंगारम, एंडि, एक्को दराता बंडां, कट्टे, जाडि, बुस्सिते पुनादि दोहना मत्ते,

13 किरिस्तु मर्रा वायाना रोजुने अंतोरा कबळ दिसंता. बारित्ते अद रोज ओर तळमितोनि वांतोर, बोर बतल कबळ कीतोर इंचि तळमिते परिकसा कियमळ जर्गता.

- 14 अद पुनादिपोर्रो दोहता कबळ निल्लि मनानय्ते, ओनकु इनाम दोर्कता.
- 15 बोनदन्ना गिंटा ओर कीता कबळ वेसि होल्ते, ओनकु नुकसान आंता. ओर अय्ते पिस्संतोर गानि तळमिताल पेय्सताप पिस्संतोर.
- 16 मिमेट पेनदा गुळि आंदिर, पेनदा आत्मा मीलोप्पो मनंता, इद मीक तेळियोना?
- 17 बोरन्नागिंटा पेनदा गुळितुन नासडेम कियानय्ते, पेन ओन नासडेम किय्यार. पेनदा गुळि पवित्र मनंता, अद मिमेटे आंदिर.
- 18 बोर आयिर ओनद-ओर पसांचकुनामन्नि. बोरन्नागिंटा मिहागटाल ई दुनियाते नना तेल्चितोन इनकुनानय्ते, पेनदा नदरते तेल्चितोर आयालय, मोदाला मुर्कनलेसी आयापींता.
- 19 दुनियाता तेल्चि पेनदा मुन्ने मुर्कतनमतद आंद. बारित्ते, “पेन तेल्चितोर्कुन ओरा उस्सारतनमता लोप्पो पसांचंता,” ☆ इंचि दर्मसास्त्रमते रासि मंता.
- 20 आनि मर्रा, “तेल्चितोर्कुना विचाराल्क एर्तम आंदुं इंचि पेनदुक एरपाटे,” ☆ इंचिगुडा दर्मसास्त्रमते रासि मंता.
- 21 अदुनहाटीं नना ईना हेंदोन, नना ओना हेंदोन इंचि मनकालोर्कुना पोरो पेद्दिरेकेम कियामन्नि, अन्नि मीवंगे आंदुं.
- 22 पौलुस आयिर, अप्पुलोस आयिर, केपाल आयिर, दुनिया आयि, पिस्वर आयि, हामुर आयि, ताकाना कालमता पोल्लें आयि, वायाना कालमता पोल्लें आयि, अन्नि मीवंगे आंदुं.
- 23 मिमेट किरिस्तुनोर आंदिर, किरिस्तु पेनदोड आंदुर.

4

पेनदा मर्ममता देकरेक कियानोर

- 1 अदुनहाटीं मोमोट किरिस्तुना सेवाकुल्कुम आनि पेनदा मर्ममता देकरेक कियानोरम आंदुम इंचि मीक तेळियमळ गावाले.
- 2 अल्हेने पेनदा मर्ममता देकरेक कियानोर विस्वासम कियानालायक मनमळ गावाले.
- 3 गानि नाकुन मीवाहेंदाल आयि हिलाकोटे लोकुल्कुना पंचायतता हेंदाल आयि, विस्वासमते मंतोरा हिल्लोरा इंचि परिक्सा कीसि हळमळ गावाले इद नावाहाटीं सिन्ना पोल्ले आंद. नावद ननाने न्यायमगुडा किय्योन.

4 नहगा बतले दोसेम दिस्सेक हिल्ले, गानि नना दोसेम हिल्वोन आयोन. पेने नाकुन परिकसा कीसि हळंता.

5 अदुनहाटी न्यायम कियाना वेला वायाका मुन्ने बोने न्यायम कियमट, सामि वायानाल एदुर हुळाट. ओर हीकटते मक्किस मत्ता पोल्लेन वेल्गुने तरंतोर, मनसुने मत्तवुन पलाते अरहंतोर. अस्के पेन अंटोर्कुन मिमेट बेस कीतिट इंचि मेच्चुकुंता.

6 विस्वासुल्कुनिटा! नना मीवाहाटी अप्पुलोसना आनि नावा उदाहरन हीसि वेहतन. बारित्ते “दर्मसास्त्रमते रासता पोल्लेक हब्बेर होनमट” इंचि मंता. इदुन पोर्गेटाल मिमेट वरोन बेसतनमते, इंकावरोन विरोदमते पेदिंदरेकम कियमट.

7 बारित्ते नीकुन आनि इंकावरोन बोर अलग हळंतुर? निहगा मत्तव अन्नि पेन हीतवे गदा, अय्ते इवन्नि नावांगे बोरे हिया हिल्लुर इत्ताप बारि पेदिंदरेकम कीतिन?

8 ओहो! मीक गावाले मत्तव अन्नि पूरा आतां, मिमेट अय्ते सिरमंत आसि होत्तिर, मोमोट हिलाकुना मिमेट राजुल्कु आतिट. गानि मिमेट निजमे राजुल्कु आसि मत्ते मोमोटगुडा मीवातोनि राज्येम किय्येम.

9 गानि बोर्क अय्ते हामुर सिक्साता आदेस हियमळ जर्गता, असटोरालेसी, प्रेरितुल्क आता मनाकुन पेन अंटोर्कुकन्ना आकिरते इरता, इंचि नाकु अनपिच्चंता. बारित्ते, मनम पेनदा दूतानाहाटी, दुनियाताहाटी, मनकालोराहाटी सिराप तमासा हुप्सानोर आसि मंतोम.

10 मोमोट किरिस्तुनाहाटी मुर्कालोरम आंदुम, गानि मिमेट किरिस्तुना लोप्पो तेल्चितोर आंदिर. मोमोट बलम हिल्वोरम आंदुम, गानि मिमेट बलम मत्तोर आंदिर. मिमेट कदर मत्तोर आंदिर, गानि मोमोट कदर हिल्वोरम आंदुम.

11 इदवेरादाका मोमोट कर्वुने-दूपाते मंतोम, केर्कालय कपळिं हिल्लें, देब्बां तिचेके मंतोम, लोन-दारा हिलाका मंतोम.

12 मावद मोमोटे कबळ कीसेक मंतोम. माकुन तेराहनोर्कुन, आसिर्वाद हींतोम. ओर माकुन तकलिप कीतुर, गानि मोमोट सहन कींतोम.

13 ओर मावा अपमानम कीतुर, मोमोट दयाते वळकंतोम. इदवेरादाकागुडा दुनियाता नदरते मोमोट कचरालेसी, मैलालेसी मंतोम.

14 नना मीक सिग्गु वायागोम इंचि इव पोल्लें रासेक हिल्लेन, गानि नावा पावरमगल्ला पिलाल्कुनसंटोर इंचि तेळियागोट्सि वेहासेक मंतन.

15 मिहगा किरिस्तुना बारेमते कराहनोर पदि वेय्कुना गुस्लुक मंदानुर, गानि मिहगा वेल्लेदुर बाबुर हिल्लुर. बारित्ते मुन्ने ननाने किरिस्तु येसुना बेसता कबुर तत्तन, अदुन मिमेट विस्वासम कीतिर इंचि ननाने मीवा बाबोनसंटोन आंदुन.

16 अदुनहाटी मिमेट नावालेसी ताकट इंचि विनंति कीसेक मंतन.

17 इदे पोल्ले वेहनाहाटी नना पावरम कियानोर आनि सामिना लोप्पो नावा विस्वासमगल्ला मर्रिनसंटोर तिमोतिन मिहगा लोहतन. नना किरिस्तु येसुना बक्त्तिते बल्हा ताकसेक मंताने, अल्हेने अन्नि जेगाना कलिसियाने नना कराहना बोदाता बारेमते ओर मीक मति कीसि हींतोर.

18 नना मिहगा वासेक हिल्लेन इंचि इच्चुर लोकुलुक पेद्दिदरकेम कीसेक मंतुर.

19 गानि सामिना मनसु मनानय्ते नना बिराने मिहगा वांतन, अस्के पेद्दिदरकेम कियानोरा पोल्लेन आयो गानि ओर्क बच्चोर ताकत मंतनो हळंतन.

20 बारित्ते पेनदा राज्येम पोल्लेने आयो गानि दाना ताकतते मंनता.

21 मीक बतल गावाले? नना मिहगा कट्टे पीसि वाकाना, हिलाकोटे पावरमते, मेत्ताटा आत्माते वाकाना?

5

विस्वासुलुक बोगमतनम कियामन्नि

1 मीवा नड्डुम वरोर बोगमतनम कीतोर इंचि नाक केंजावाता. ओर ओना बाबोना मुत्तो इत्ते सिन्ना यावान इरकुत्तोर अले! इसोंटा तप्पुड कबळ अविस्वासुलुकगुडा किय्युर.

2 इदुनाहाटी मीक दुक्कम आया मत्ता, गानि मिमेट पेद्दिदरकेम कीसेक मंतिर. असंटोन मीवा लोप्पोटाल पेचाहचि गेदुमगोम.

3 नना मिहागटाल मेंदुल्ले लक्कु मंतन, गानि आत्माते मीवातोनि मंतन. आत्माते मीवातोनि मत्ताहाटी ओनद नना मुन्नेने न्यायम कीतन.

4 बस्के अय्ते मिमेट येसु सामिना पोरोलते उंदगा जमा आसि उदंतिर, अस्के आत्माते अगा मंनंतन, अल्हेने मना सामि येसुना ताकत मीवातोनि मंनता.

5 असोंटा तप्पुड कबळ कियानोना मेंदुल्लुन नासडेम कियालय पेद्दा देय्यमता कय्दे अप्पजेप्पना. बारित्ते, ओक्कला ओर पस्चातापम कियानय्ते, सामि वायाना रोजुने ओना आत्मा पिस्सार.

6 मिमेट पेदिदरकेम कियमळ बेस आयो, इच्चुर पुल्लाटा पिंडि वेल्लेन पिंडिते कल्पते, पूरा पिंडितुन पुल्लगा कीता अद मीक एरपाटे मंता.

7 पळाना पुल्लाटा पिंडितसंटोन तेंडसि पोहाचि मिमेट पूना पिंडि मुद्दा आया परांतिर, बारित्ते मिमेट निजमे पुल्लाटोर आयवाहाटीं, येसु किरिस्तु मना दाटसि होनना पंडुगुना गोंरि पोरिनलेसी मोक्कु आतोर.

8 अदुनहाटीं मनम पळाना पुल्लाटा पिंडितसोंटा कराब कबाह्कुने, दुस्ट गुनाल्कुने आयो गानि इमानदारता, सत्तेमता पुल्लगा आयवा हारिनसोंटा पंडुगु कियमळ गावाले.

9 नना मुन्ने रासि लोहता सिट्टिते, बोगमतनम कियानोरतोनि कलियसि मनमट इंचि रासि मत्तन.

10 इदुना अर्तम बोगमतनम कियानोरतोनि, आस्ति कियानोरतोनि, दोंगा कीसि तिनानोर्कुनतोनि, बोम्मांक मोळकानोर्कुनतोनि कलियसि मनमन्नि इत्ताप आयो. इल्हा इनानय्ते मरि दुनियातुने होळसा पीता.

11 नना इनना पोल्ले बतल इत्ते, मीवा लोप्पोटाल बोरन्ना ओनद ओर विस्वासिन इंतोर, गानि ओर बोगमतनम कियमळ, आस्ति कियमळ, बोम्मान मोळकमळ, अपमानम कियमळ, रिम्मा आयमळ, दोंगा कीसि तिनमळ इसोंटा गुनम ओनालोप्पो मनानय्ते ओनतोनि कलियसि मनमट, ओनतोनि गाटो तिनमट इंचि रासि मत्तन.

12 विस्वासम कियवोरा न्यायम नना बारि कीकन? बोर अय्ते विस्वासमते मंतुर, ओरा न्यायम मिमेट किथ्यिरा?

13 विस्वासम कियवोरा न्यायम पेने कीता. अदुनहाटीं आ बोगमतनमतोन पेचाहचि गेदमट.

6

विस्वासुल्कुना नड्डुम जर्गना न्यायाल्क

1 बस्के अय्ते मीलोप्पो जगडम आंता, आ जगडमता न्यायम कियालय मिमेट पेनदा लोकुल्कुनगा होनाका विस्वासम कियवोरगा होंचि न्यायम कियाना हिम्मत बारि कीतिर?

2 पेनदा लोकुल्क आकिर वेलाते दुनियाता न्यायम कीतिर, इद मीक एरपाट हिल्लेना? मिमेट पूरा दुनियाता न्यायम कीतिर अय्ते, इव सिन्ना-सिन्ना पोल्लेना न्यायम कियानालायक हिल्लिरा?

3 मिमेट पेनदा दूतनगुडा न्यायम कीतिट इंचि मीक एरपाटे मंता. अय्ते रोजता पिस्वरते जर्गानव सिन्ना-सिन्ना पोल्लेन न्यायम मिमेट किया परिरा?

4 मीवा लोप्पोगिंटा इल्हा जगडाल्क मनानय्ते, बोर अय्ते कलिसियाता पोल्ले बतले तेळियवोर मंतुर, असंटोरगा न्यायम किया वेहालय बारि दांतिर?

5 मी विस्वासुल्कुना नड्डुम न्यायम कियानालायक तेल्विगल्लोड वरोरगुडा हिल्लोरा? मीक सिग्गु वायगोम इंचि इल्हा इंचेके मंतन.

6 वरोर विस्वासि इंकावरोर विस्वासिंक अड्डम न्यायम कियालय पंचादितगा दांतोर, अदगुडा विस्वास कियवोरा मुन्ने.

7 निजम इत्ते मीलोप्पो लोल्लिं कियमळे तप्पु आंद. दानकन्ना अन्यायम ओर्सकुनमळ बेस आयोना? नुकसानतुन ओप्कुनमळ बेस आयोना?

8 अल्हा कियवा, मिमेट तप्पु कबळ कीतिर, अन्यायम कीतिर, अदगुडा मीवा दंटा विस्वासुल्कुंके कीतिर.

9-10 अन्यायम कियाना लोकुल्क पेनदा राज्येमते वारसदार आयुर इंचि मीक तेळियोना? मिमेट दोकाते अरमट. व्यबिचारम कियानोर, बोम्मांक मोळ्कानोर, बोगमतनम कियानोर, मांडसा मांडसातोनि बोगमतनम कियानोर, मुरतळ मुरतळतोनि बोगमतनम कियानद, दोंगातनम कियानोर, आस्ति कियानोर, कल्लु उनानोर, तेराहनोर, इंकावरोन मुळाहनोर पेनदा राज्येमता वारसदार आयोर.

11 मुन्ने मीवा नड्डुम इच्चुर इल्हे मल्लिर. गानि मिमेट येसु किरिस्तुना पोरोलते आनि पेनदा आत्माते नोर्कुचि, पवित्र आसि नीतिमंतुल्क आतिर.

मेंदुलतुन पेनदा महिमाताहाटीं वाळकुंदु

12 नना बतलन्ना किया वच्चु, गानि अव अन्नि पायदातव आयों. नना बतलन्ना किया वच्चु, गानि नना अवुना कयदा हिल्लु मन्नोन.

13 गाटो पीटाहाटीं, पीर गाटोताहाटीं मंता इंचि मिमेट इंतिर, गानि पेन इव रोंडुन इंका नासडेम कींता. मेंदुल बोगमतनम कियालय आयो सामिनाहाटीं मंता, सामि मना मेंदुलताहाटीं मंतोर.

14 पेन दाना ताकततोनि सामिन हामुरताल जीवाते तेहता, अल्हेने मनाकुनगुडा हामुरताल जीवाते तेहंता.

15 मीवा मेंदुल्क किरिस्तुना मेंदुल्ला उंदि बागाल्क आंदुं इंचि मीक एरपाट मंता गदा! एरपाट मल्लस्के नना अवुन ओसि बोगमदाना मेंदुललेसीं कीकाना? बस्केने किय्योन.

16 बोर अय्ते बोगमदानतोनि मीडंतोर, ओर दानतोनि उंदि मेंदुल आंतोर. “ओर इव्वुर उंदि मेंदुल आंतुर” इंचि दर्मसास्त्रमते रासि मंता.☆

17 गानि बोर अय्ते सामिनतोनि उंदि आंतोर, ओर ओनतोनि आत्माते उंदि आंतोर.

18 व्यबिचारमताल लक्कु मंटु. मेंदुलता पलाताल वायना पापालक अच्चोर बतल किय्यो, गानि बोर अय्ते व्यबिचारम कींतोर, ओर ओनादे मेंदुलक अड्डम पापम कींतोर.

19 मीवा मेंदुल पवित्र आत्माता गुळि आंद, अद पेनदाहेंदाल मीलोप्पो वासि मनंता, ई मेंदुल मीवद आयो, इंचि मीक तेळियोना?

20 बारित्ते पेन मीकुन दरा दोस्सि अस्कुत्ता, अदुनहाटी मिमेट मीवा मेंदुलताहेंदाल दाना महिमा कीम्टु.

7

मर्मिना बारेमते

1 अव पोल्लेने बारेमते मिमेट नाक रासि मत्तिर. नना मीक वेहासेके, मांडसा बदन्ना मुरतटुन इट्टाकोटेन ओनाहाटी बेस मनंता.

2 गानि व्यबिचारम जर्गामनि इंचि हरेक मांडसक मुत्तो गावाले, हरेक मुरतळ्ळक मुय्दो गावाले.

3 मुय्दो ओना मुत्तोना हक्कु पूरा कियमळ गावाले, मुत्तो दाना मुय्दोना हक्कु पूरा कियमळ गावाले.

4 मुत्तोंक दाना मेंदुलपोर्गे अदिकार हिल्ले गानि दाना मुय्दोंक अदिकार मंता, अल्हेने मुय्दोंक ओना मेंदुलपोर्गे अदिकार हिल्ले गानि मुत्तोंक मंता.

5 अदुनहाटी मिमेट वरोंक-वरोर अलग मनमट. गानि कोन्नि रोजकु पारतना कियालय अलग मनकोम इंचि मिमेट इव्वुर इनकुत्ते, अलग मंटु. दाना पजा मरी कलियसि मंटु. बारित्ते, कुदता मनसुन आपकुना परवस्के देय्यम मीकुन पट्टुने अरहालय हळंता.

6 नना वेहानद आदेस आयो, गानि अल्हा कीते मीके बेस मनंता.

7 अंतोर लोकुलक नावालेसी मनागोम इंचि नाक अनपिच्चंता. गानि हरेक मनकंक पेनदाहेंदाल अलग-अलग वरम दोर्किस मंता, बोनको बदो तीरनद, इंका बोनको इंकुंदि तीरनद वरम दोर्किस मंता.

8 मरमि आयवोर्कुंक आनि मुंडा मोस्तवुंक नना वेहसेक मंतन, ओर नावालेसीं मरमि आयाकुंटा मत्तेने ओराहाटीं बेस.

9 गानि ओरगिंटा कुदता मनसुन आपा पराकोंटे मरमि आयिर. बारित्ते मेंदुल्ला इच्चा आसि तनलाळसेक मनना दानकन्ना मरमि आयमळ बेस.

10 गानि बोरां अय्ते मरमि आतां, ओर्क नावद आयो, सामिना आदेस मंता, मुत्तो दाना मुय्दोन होळसा मनि.

11 अदगिंटा होळसानय्ते, अद इंकावरोनतोनि मरमि आयाकोंटेन मंदना, हिलाकोंटे दाना मुय्दोनतोनि मर्रा सांतिते कलियसि मंदना. मुय्दो ओना मुत्तोन होळसिया मनि.

12 इंदके कळमतोराहाटीं नना वेहसेक मंतन, पेन आयो. बोनदन्ना विस्वासि दादाना मुत्तो पेनदुन विस्वासम किय्यो, गानि दानकु ओनातोनि मनालय पसंद मत्ते, ओर दान होळसा मनि.

13 अल्हेने ओक्कला बदन्ना विस्वासि अक्कना मुय्दो विस्वासम किय्योर, गानि ओर दानतोनि कूस मंतोर, अय्ते अद ओन होळसा मनि.

14 बारित्ते अविस्वासि मुय्दो, विस्वासम कीता ओना मुत्तोनतोनि मंचि पवित्र आतोर. अल्हेने विस्वासम कियवा मुत्तो, विस्वासम कीता दाना मुय्दोनतोनि मंचि पवित्र आसि दांता. अल्हा आयाकुंटा मंचि मते मीवा पिलाल्क पवित्र आयाकोन्नेर, गानि ओर इंदके पवित्र मंतुर.

15 अय्नागानि अविस्वासि मुत्तो आयि मुय्दो आयि ओक्कला ओर होळसंतन इनानय्ते होळसिरकांटी. इद पोल्लेतुन विस्वासम कियाना दादल आयि अक्कल आयि आपामन्नि. बारित्ते, पेन मनाकुन सांतिते पिसालय केयता.

16 ए मुरतटुना, * नीवा विस्वासम कियवा मुय्दोन पिसागोटंतिन इंचि नीकु बतल एरपाट? ए मांड्सातुना, † नीवा विस्वासम कियवा मुत्तोन पिसागोटंतिन इंचि नीकु बतल एरपाट?

पेन बारि केयतनो अदुनहाटीगे पिस्सट

17 गानि बल्हा अय्ते मीकुन सामि निलाहतोर, बल्हा अय्ते मीकुन पेन केयता, अल्हेने मिमेट मंटु. इद अन्नि कलिसियाने नावा नियम आंद.

* 7:16 ए मुरतटुना इगो दीना अर्तम, विस्वासम कीता मुत्तो. † 7:16 ए मांड्सातुना इगो दीना विस्वासम कीता मुय्दो.

18 अद बल्हा इत्ते, पेनदुन विस्वासम कियाका मुन्ने कतना कीसि मनानय्ते, अदुन मकिच्चा मनि. पेनदुन विस्वासम कियाका मुन्ने कतना कियाकौंटा मत्ते, ओर कतना कीकुन्ना मनि.

19 कतना कियाना, कियाकुन्ना बतल आयो, गानि पेनदा आदेसते ताकमळे पेद्दा पोल्ले आंद.

20 हरेक मनकन ओर बल्हा मननेंके पेन ओन केयतनो, अल्हेने ओर मनागोम.

21 निमे गिंटा दास आसि मत्तस्के पेन केयते, निमे अदुना पिकिर कियमा. गानि अव्टेताल इळबळाना मोका वाते, दाना पायदा एता.

22 बारित्ते, दास आसि मत्तस्के निमे सामिन विस्वासम कीतिन, अव्टेताल इळबळतिन. इळबळतस्के सामिन विस्वासम कीतिन अय्ते किरिस्तुना दास आतिन.

23 पेन मीकुन दरा दोस्सि अस्कुत्ता, दानहाटीं मनकालोरा दास आयमटु.

24 विस्वासुल्कुनिटा! पेन मीकुन केयतस्के बल्हा मत्तिरो, अल्हेने दानतोनि कलियसि मंदु.

25 मरमिं आयववुना बोरेमते सामि नाकु बतले आदेस हिया हिल्लोर, गानि नावा मनसुना पोल्ले मीक वेहसेक मंतन. सामिना दयाहेंदाल, नना दान बरोसा कीतन.

26 इंदकेटा तकलिपकुनाहाटीं मनकल बल्हा मंतोर अल्हेने मत्ते बेस इंचि नना इनकुंचेके मंतन.

27 नीकु मुत्तो मत्ते अदुन होळसना कोसिस कियमा, मुत्तो हिलाकौंटे मरमिं आयना विचारम कियमा.

28 निमे मरमिं कीकुत्ते बतल पापम आयो, लेय्या पेगिळ मरमिं कीकुत्ते अदगुडा बतल पापम आयो. अय्नागानि बोर अय्ते मरमिं आंतुर, ओरा पिस्वरते तकलिपकु वांतां. असौंटा तकलिपकुने अर्रानायो इंचि नना कोरसंतन.

29 विस्वासुल्कुनिटा! नना वेहानद बतल इत्ते, वेला तक्को मंता. अदुनहाटीं इंदकेताल मुन्ने बोन्क मुत्तो मंता, ओर मुत्तो हिल्वाप मंदना.

30 अळानोर मत्ते, अळवोर लेहका मंदना, आनंदमते मत्तोर आनंदमते हिल्वाप मंदना, सामानकु अस्सानोर बतले हिल्वाप मंदना.

31 इद दुनियाते मनम बतलय्ते कीतोम दाना लोप्पेन मंदनायो. बारित्ते दुनियातव अन्नि नासडेम आयानव आंदुं.

32 मिमेट बदे पोल्लेते पिकिर किया मनि इंचि नना इनकुंचेके मंतन. मरमिं आयवोर पेनदुन बल्हा कूस इर्राना इंचि पेनदा पोल्लेना पिकरते मनंतोर.

33 गानि मरमिं आता मनकल ओना मुत्तोन बल्हा कूस इराना इंचि दुनियाता पोल्लेने पिकरते मनंतोर.

34 अदुनहाटीं ओरा मनसु रोंडु तीस्कुने कबळ कीता. अल्हेने मरमिं आयवा मुरतळ पेनदुन बल्हा कूस कियाना इंचि मेंदुल्ले आनि आत्माते पवित्र मंचि पेनदा पोल्लेना पिकरते मनंता. गानि मरमिं आता मुरतळ मुय्दोन बल्हा कूस इराना इंचि दुनियाता पिकरते मनंता.

35 नना मीवा पायदाताहाटींगे इद पोल्ले वेहासेक मंतन, मीकुन पसांचालय आयो. गानि मिमेट सत्तेमते ताकसि, उंदि मनसुने पेनदा सेवाते मंटु.

36 बोरन्नागिंटा, “मना मिय्यटा‡ लेय्यातनम होंचेके मंता, दाना अपमानम आयाका मुन्ने मरमिं कियमळ गावाले,” इंचि इनकुनानय्ते मरमिं कीसि हिथ्यिरकांटी, अद पापम आयो.

37 गानि ओर ओक्कला मरमिं कीसि हियमळ अक्सरम हिल्ले इंचि मनसुनाल निरनायम कियानय्ते, अद दाना इच्चान आपापते दान्क मरमिं कियवा बेसे कीतोर.

38 बोर अय्ते ओना मिय्यटा मरमिं कीतोर, ओर बेसे कीतोर. अल्हेने बोर अय्ते ओना मिय्यटा मरमिं किया हिल्लोर ओर इंका बेसे कीतोर.

39 मुय्दो पिसि मत्तच्चोरजेम मुत्तो मुय्दोनतोनि होळसाकोंटा मनंता, गानि ओरगिंटा हायानय्ते अद बोनतोनना सामिन विस्वासम कीतोनतोनि मरमिं आया परांता.

40 गानि अद इंकावरोनतोनि मरमिं आयाकोंटा मत्तेने बेस इंचि नना इनकुंचेके मंतन, अल्हेने नावा लोप्पो मनना पेनदा आत्माता हेंदाले नना मीक वेहासेक इंचि इनकुंचेके मंतन.

8

मोळकता उपारम

1 इंदके, बोम्मनगा मोळकता उपारमता बारेमते वेहंतन, मनम अंतोरम तेल्चितोर्कुम इंचि मनाकु एरपाटे मंता. तेल्विता हेंदाल गरी वांता, गानि पावरम बक्तितुन बेसिंगोटंता.

2 बोरन्नागिंटा नाक पूरा तेळियंता इंचि इनकुनानय्ते, ओन्क बतलय्ते तेळियमळ गावाले, अद इंदकेगुडा तेळिया हिल्ले.

3 गानि बोरन्नागिंटा पेनदुन पावरम कीते, पेनदुक ओर एरपाटे.

‡ 7:36 मिय्यटा एर्रा बोदूट आता मिय्यड.

4 अदुनहाटीं बोम्मनगा मोळकता उपारमतुन तिनना बारेमते नना मीक वेहंतन, दुनियाते मनना बोम्मने पेन हिल्ले. पेन उंदे मंता, अद आयाका इंका वेरे पेन हिल्ले.

5-6 अय्नागानि स्वर्गमते आयि, बूमिपोर्रो आयि पेनकु, सामि इंचि इनानव वेल्लेने मंतां. गानि मनाकु उंदे पेन, ओरे मना बाबो आंदुर. ओनाहेंदाले इवन्नि तयार आतां, मनम ओनाहाटींगे मंतोम. अल्हेने सामि वरोरे आंदुर. ओर येसु किरिस्तु आंदुर. पेन, ओनाहेंदाले इवन्नि तयार कीता, मनमगुडा ओनाहेंदाले पिस्सि मनंतोम.

7 गानि अंतोर विस्वासुल्लुकुंक ई तेल्वि हिल्ले. इच्चुर मोदाटाले बोम्मन मोळिकसि मत्ताहाटीं, अगा मोळकता उपारमतुन तितुर. अदुनहाटीं ओरा कमजोर मनसु कराब आसि दांता.

8 गाटो मनाकुन पेनदा दग्गेर्क ओयो. मनम तिनाकुन्ना मनद नुकसान आयो, तिनना बतल पायदा आयो.

9 मिमेट बदन्ना उपारम तितिर आयावच्चु गानि उंदि पोल्ले मति इर्राट, मीवाहेंदाल विस्वासमते कमजोर मत्तोर पापमते अर्नायायो.

10 बारित्ते निमे तेल्विता मनकन, निमेने गुळिते* बोम्मनगा मोळकता उपारमतुन तिनानय्ते, वरोर कमजोर विस्वासि अदुन हळतस्के, गुळिते मोळकतवुन तिनालय ओना मनसु आयोना?

11 ओनाहाटींगुडा किरिस्तु हातोर, इल्हा नीवा तेल्विहेंदाल, विस्वासमते कमजोर मत्ता विस्वासि पेनदागटाल लक्कु आंतोर.

12 इल्हा निमे नीवा दंटाता विस्वासुल्लुकुना विरोदमते पापम कीसि, कमजोर विस्वासिना मनसुन नोप्पिचि, किरिस्तुना विरोदमते तप्पु कीतिन.

13 अदुनहाटीं ओक्कला उपारमताहेंदाल नना नावा दंटाता विस्वासुल्लुकुन पापमते अरहानय्ते, नना बस्केने हव्विं तिन्नोन. नावाहेंदाल ओर बस्केने पापमते अर्ना मनि.

9

प्रेरितुल्लुकुना अदिकाराल्क

1 नना दासतनमताल इळबळसि हिल्लेना? नना प्रेरितुन आयोना? मना सामि येसुन नना ह्ळा हिल्लेना? सामिना लोप्पो नावा कबळता पलम मिमेट आयिरा?

* 8:10 गुळिते पेनकु मनना गुळि.

2 नना वेंरे लोकल्लुकुनाहाटीं प्रेरित आयाकोन्ना गानि मीवाहाटीं अय्ते प्रेरितुने आंदुन. नना सामिन लोप्पो प्रेरितुन इंचि मिमेटे सिक्कालेसीं निसान आंदिट.

3 बोर अय्ते नावातोनि वाद-विवाद कियालय ह्ळ्ळंतुर, ओराहाटीं इद नावा जवाब आंद.

4 माकु तिनना-उनना अदिकारम हिल्लेना?

5 कळमता प्रेरितुल्क, सामिना तम्मुह्क आनि केपल (पत्रु) ईर ओरा मुत्तोह्कुन पीकुंचि तिरियताप मोमोटगुडा विस्वासि मुरतळतोनि मरमि आसि पज्जेके पीकुंचि तिरियना अदिकारम माक हिल्लेना?

6 हिलाकोंटे पिस्वरहाटीं कबळ कियाकोंटा मनालय सिराप बरनाबास आनि नाके अदिकारम हिल्लेना?

7 बोर ओना संतम कोत्तां कर्स कीसि सिपाइना नौकरि कीतोर? बोर अंगुरता बगिचा कीसि अंगुर पंडिं तिनाका मनंतोर? आनि बोर गोळ्ळु-गोरे पोसकीसि अवुना पाल उनाका मनंतोर? बोरे मन्नोर.

8 नना मनकना रीतिटे इल्हा इंचेके मंताना? हिल्ले.

9 “कळाटे बंति तिराहनेंके कोंदांक मूस्का बुट्टि दोहा मनि.” इद पोल्ले सिराप कोंदानाहाटीं पेन वेहा हिल्ले, मूसाना नियमतेगुडा इल्हे रासि मंता.

10 मनाहाटीं गुडा वेहता. बारित्ते ऊडानोर आसेतेन ऊडंतोर आनि बंति तिरहानोरगुडा पंटाते पाल गावाले इत्ता आसेतेन बंति तिरहंतोर.*

11 मोमोट मीलोप्पो बेस आत्माता विज्जां वीततोम. अय्ते माक अक्सरम मत्तवुन मिमेट हीते, अवुन एतमळ बतल तप्पु आंदा? तप्पु आयो.

12 वेंरेतोरक गिंटा मीपोरों अदिकारम मत्ते, दानकन्ना एक्को माक अदिकारम मनंता. गानि किरिस्तुना बेसता कबुरतुन वेहनेंके मावाहेंदाल बतले अड्डम वायामन्नि इंचि मोमोट आ अदिकारम एताका अन्नि सहन कीसेक मंतोम.

13 मीक अय्ते एरपाटे मंता, गुळितगा सेवा कियानोर्कुंक गुळितगटाले गाटो दोर्कता. गद्देतगा सेवा कियानोर्कुंक अगा अरतवुनाल तूस दोर्कता.*

14 अल्हेने किरिस्तुना बेसता कबुर वेहानोर्कुंक, बोर अय्ते अद कबुर केंजसि विस्वास कीतुर, ओरा हेंदाले पिस्वर दोर्कागोम इंचि सामि हुकुम हीतोर.

15 गानि बोरन्ना नावा पेद्दिदरकेम एर्तम कियानादानकन्ना नाक हायमळे बेस अनपिच्चंता. अदुनहाटीं नना बोनाहेंदाले पिस्वरता पाय्दा एता हिल्लेन, मिमेट

* **9:10** किरिस्तुना सेवा कियानोर बोरगा सेवा कीतोर ओरागेन तिदना. **9:13** लैव्यवस्ता 6:16,26; व्यवस्ताविवरन 18:1-3

नावाहाटीं इल्हा कीम्टु इंचिगुडा रासेक हिल्लेन.

16 नना बेसता कबुर वेहचि बतल पेद्दिदरकेम कीसेक हिल्लेन. बारित्ते इद नावा जिम्मेदारि आंद, नाक बेसता कबुर वेहमळे गावाले. ओक्कला वेहाकोटे नना बूळ्दि आकन.

17 नना ओक्कला नावा इच्चाताल इदुन कीते नाक इनाम दोर्कता. ना इच्चाताल कियाकोन्नागानि दाना जिम्मेदारि पेन नाक अप्पजेपता.

18 अय्ते नावा इनाम बतल? नना बेसता कबुर वेहनेके नाक दोर्कना अदिकारम एताका बेसता कबुर पुक्कटते वेहमळ, इदे नावा इनाम आंद.

19 बारित्ते, नना बोना कय्दा हिळु हिल्लेन, अय्नागानि वेल्लेटोर्कुन किरिस्तुनगा पीसि वायाना इंचि नावद-नना अंटोरा दासुन आतन.

20 यहुदिल्कुन किरिस्तुनगा तरालय नना यहुदिल्कुनालेसीं आतन. मूसाना नियमते ताकानोर्कुन किरिस्तुनगा तरालय मूसाना नियमते ताकाना अक्सरम हिलाकोन्ना गानि नियम पीसि ताकतन.

21 मूसाना नियम पीसि ताकवोर्कुन किरिस्तुनगा तरालय नियम हिल्वोरलेसीं आतन. इत्ते पेनदा नियमतुन पास्कंतन इंचि आयो, गानि किरिस्तुना नियम पीसि ताकानोन आंदुन.

22 विस्वासमते कमजोर मत्तोर्कुन किरिस्तुनगा तरालय, नना ओरालेसीं आतन. बल्हैना आयि इच्चुरन्ना पिसागोम इंचि, बोर बल्हा मंतुर, ननागुडा ओरालेसीं आतन.

23 ओरतोनि बेसता कबुरता आसिर्वादते नाकगुडा तूस दोर्कना इंचि इवन्नि कीसेक मंतन.

24 पंदेम वाटसि वितनेके अंटोरे वित्तंतुर, गानि इनाम वरोके दोर्कता इंचि मीक एपाटे मंता. मिमेटगुडा वितनेके इनाम दोर्कनालेसीं वित्तट.

25 कर्सानोर अंटोर बेस करियसि ओरद-ओर तयारते मनंतुर, अदगुडा नासडेम आयाना किरिटम दोर्किच्कुनालय इवन्नि कीतुर. गानि मनम अय्ते बस्केने नासडेम आयवा किरिटम दोर्किच्कुनालय कीतोम.

26 अदुनहाटीं नना बद जेगातगळ्ळ अय्ते वित्तना, अगळ्ळ बेस वित्तंतन, ननागुडा पिळ्ळिल्लते गुद्सेक लडांचंतन, वळिते लडांचताप आयो.

27 नना ना मैदुल्लुन आपकुंचि इरंतन. नना वैरेतोर्कुन बेसता कबुर वेहचि, नावा लोपेने तक्को मत्ते नना बाता कबळतोन आयोन.

10

बोम्मना पूजा कियमट

1 विस्वासुल्कुनिटा! इद पोल्ले मीक तेळियका मनमळ नाक इस्टम हिल्ले. अद बतल इत्ते, मना एनकटा तादो-बाबुर अंटोर मब्बु तेर्पेता हिळु मंचि समुद्रमता नड्डुमताल ताकतुर.

2 इल्हा ओर मब्बु तेर्पे हिळु, समुद्रमता नड्डुम मत्ताहेंदाल ओर अंटोर मूसाना बापतिस्मा एततालेसी आता

3-4 ओर अंटोर उंदे आत्माता गाटो तित्तुर, उंदे आत्माता एर उट्टुर. पेन ओर्क बंडाताल एर हीता. अद बंडा इत्तेने किरिस्तु आंदुर, ओरे ओरतोनि ताकुंदुर.

5 गानि पेन ओरवेटाल वेल्लेटुर लोकुल्कुनपोर्री कूस मनाहिल्ले. अदुनहाटी ओर अदे बय्लि जेगाते हातुर.

6 बल्हा अय्ते मना तादो-बाबुर पेनदुक इस्टम हिल्ला पोल्लेने ताकतुर, अल्हा मनम ताका मनि इंचि इव पोल्लें मनाकु उदाहरनलेसी वेहंतां.

7 ओरागटाल इच्चुर बोम्मां कीसि मोळ्ळकतुर, अल्हा मिमेट बोम्मांक मोळ्ळकाना आयो. ओरा बारिमते, “लोकुल्क तिनालय, उनालय उदतुर आनि तेदसि एगरालय दल्गतुर,” इंचि दर्मसास्त्रमते रासि मंता.

8 ओरागटाल इच्चुर बोगमतनम कियुंदुर. अदुनहाटी ओरावेटाल उंदे रोजते इरवै मूड वेय्कुना मंदितुन हव्कमळ जर्गता. मनम ओरालेसी बोगमतनम कियामनि.

9 ओरागटाल इच्चुर पेनदा पट्टु हळुंदुर, ओर तरासकु कस्किसि हातुर. मनम ओरालेसी किरिस्तुना पट्टु हळा मनि.

10 ओरागटाल इच्चुर गुल्गुंदुर, नासडेम कियाना दूता हेंदाल ओर नासडेम आतुर. ओरालेसी मिमेट गुल्गामट.

11 मना तादो-बाबुर्क जर्गता पोल्लें उंदि उदाहरनलेसी मंचि, मनम आकिर युगमते एवताहाटी मनाकु तेळियागोम इंचि रासमळ जर्गता.

12 बोर अय्ते नना विस्वासमते गट्टिगा नित्तिसि मंतन इंचि विचारम कींतोरो, ओर विस्वासमताल अर्रामनि इंचि कापाळकुनना.

13 अंटोर्क वायानसोंटवे परिकसां मीक बातां, दानकन्ना एक्को परिकसां मीक वाया हिल्लें. गानि पेन विस्वासमगल्लद आंद. अद मीतोनि आया परवसोंटा एक्को परिकसाने अर्र हिश्यो, परिकसां वाते मिमेट सहन कियागोम इंचि अवेटाल पेय्सना हर्रिगुडा पेन कीता.

सामिना उपारम आनि बोम्माना उपारम

14 अदुनहाटीं नावा पावरमगल्ला विस्वासुल्कुनिटा! बोम्माना पूजेनाल लक्कु मंतु.

15 मिमेट बुद्धिमंतुल्कु आंदिर इंचि नना वेहसेक मंतन. नना वेहाना पोल्लेन मिमेट कुद निरनायम एतट.

16 मनम दन्यवाद कीसि, उंदे गिलासते अंगुर पानकम उट्टस्के, किरिस्तुना नेत्तुर मना अंटोराहाटीं हीतोर इंचि हुपिच्चेक मंतोम. मनम उंदे हारितुन तुकडां कीसि तित्तस्के किरिस्तुना मेंदुल मना अंटोराहाटीं हीतोर इंचि हुपिच्चेक मंतोम.

17 मनम अंटोरम उंदे हारिता तुकडां तित्ताहाटीं, मनम वेल्लेटुर मंचिगुडा उंदे मेंदुललेसीं मंतोम.

18 इस्राएल लोकुल्कुनहेके हुळाट! गद्देपोर्रो मोक्कु हीतवुन तित्तस्के, गद्देपोर्रोटा मोक्कु मावा अंटोराहाटीं इंचि हुपिच्चेक मंतुर.

19 नना बतल वेहसेक इत्ते, बोम्मांक मोळकता गाटोक बतल हिल्ले, बोम्मन लोप्पोगुडा बतल हिल्ले.

20 इच्चोरे गदा, बोम्मांक मोळकानोर, देय्याल्कुंक मोळकसेक गानि पेनदुक आयो. अदुनहाटीं मिमेट देय्याल्कुनतोनि पोत्तु आयमळ नाक इस्टम हिल्ले.

21 मिमेट सामिना गिलासतद आनि देय्यमता गिलासतद इल्हा रोंडुन उन्ना पर्रिर, अल्हेने सामिना उपारम आनि देय्यमता उपारम रोंडुने पोत्तु आया पर्रिर.

22 इल्हा कीसि मनम सामिक होंग वायानाल कीतोम. मनम पेनदुकन्ना बलवंतुल्कुमा? आयोम.

23 अन्नि मनाहाटीं बेसे आंदुं, गानि अन्नि कबळतव आयों. अन्नि मनाहाटीं बेसे आंदुं, गानि अन्नि बक्तिते एदुनाहाटीं बेस आयों.

24 बोरे आयिर ओना पायदातुने हळा मनि, इंकावरोना पायदातुनगुडा हळना.

25 हाटुमताल बवन्ना हव्विं अस्सि तिनावच्चु. तिनकना, तिना मान्निआ इंचेके मीवा मनसुन सवाल कियमट.

26 बारित्ते, “बूमि, बूमि पोर्गेटव अन्नि सामिनवे आंदुं” इंचि दर्मसास्त्रमते रासि मंता.

27 बोरन्ना विस्वासम कियबोर मीकुन गाटोक केयानय्ते, मीक होनना मनसु आते, होंट. अगा होत्ता पजा, बतलय्ते मीक तिनालय हीतोर अदुन मनसुने बतले सवाल कियाका तिंटु.

28 गानि मीकुन बोरन्ना, “इद बोम्मनगा मोळकतद आंद,” इंचि इनानय्ते, वेहतोनाहाटीं आनि बेस बुद्दिताहाटीं तिनमट.

29 इत्ते, “बेस बुद्दि” मीवद आयो गानि मुन्नेटोना बेस बुद्दिता बारैमते इंचेके मंतन. मीवाहाटीं इंकावरोन बारि वेहा हिय्यना.

30 नना दन्यवाद कीसि गाटो तितन अय्ते, दन्यवाद कीताहाटीं बदनाम बारि आयाना?

31 अदुनहाटीं मिमेट उनमळ, तिनमळ बतल कियाना गानि पेनदा महिमाताहाटींगे कियाना.

32 यहूदि लोकल्लुकुं, युनानि लोकल्लुकुं आनि कलिसियातोकुं अड्डम आयाना लायक मनमट.

33 ननागुडा ओर पिसागोम इंचि, नावा पाय्दा हळाका, वेल्लेदुर लोकल्लुकुना पाय्दाताहाटीं, अन्नि पोल्लेने अंतोकुंन कूस इरंतन. बारित्ते ओर्क मुक्ति दोर्कगोम.

11

आरादनातस्के मुर्ताहक तल्ला मुचमळ

1 नना किरिस्तुनलेसीं ताकतन, मिमेटगुडा नावालेसीं ताकट.

2 अन्नि पोल्लेने नाकुन मिमेट मति कीसेक मंतिट, नना मीक कराहचि अप्पजेपता पोल्लेने ताकसेके मंतिट, इंचि नना मीकुन तल्सकुंचेके मंतन.

3 गानि मीक इद पोल्ले तेळियमळ गावाले, किरिस्तु, मांडसाता तल्लातालेसीं आंदुर, मांडसा मुरताहकुना तल्लातालेसीं आंदुर, पेन किरिस्तुना तल्लातालेसीं आंदुर.

4 बोरन्ना मांडसा पारतना कियानेके, हिलाकोंटे बविस्यवानि कियानेके तल्लातुन मुच्चुनानय्ते ओर तल्लातुन* अपमानम कीतोर.

5 गानि बदन्ना मुरतळ पारतना कियानेके हिलाकोंटे बविस्यवानि कियानेके दाना तला मुच्चुनाकोंटे, अद दाना तल्लाता अपमानम कीताप आनि गुंडु कीताप आंद.

6 बदन्ना मुरतळ ओक्कला तल्लातुन मुच्चुनाकोंटे दाना केल्लुकुन कतरिचकुनना. अद केल्लुकुन कतरिचकुनमळ, हिलाकोंटे गुंडु कीकुनमळ इद सिग्गु पोल्ले आंद इंचि अनपिस्ते, अद तल्लातुन मुच्चुनना.

7 मांडसा ओना तल्लातुन मुचमळ बेस आयो, ओर पेनदा रूपम आनि महिमा आंदुर, गानि मुरतळ अय्ते मांडसाता कदर आंद.

* 11:4 तल्लातुन तल्लातुन इत्ते किरिस्तुन.

8 बारित्ते, मांडसा मुरतटाल वायाहिल्लोर, गानि मुरतळ मांडसाताल वाता.

9 मांडसा मुरतटाहाटीं तयार कियमळ जर्गाहिल्ले, गानि मुरतळ मांडसाताहाटीं तयार कियमळ जर्गता.

10 अदुनहाटीं पारतना कियानेके पेनदा दूतां हळसेक इंचि मुरतळ, मांडसाता अदिकारमता कयदा हिल्ल मंतन इंचि हुप्सालय दाना तला मुचकुनमळ गावाले.

11 अयनागानि पेनदा लोप्पो मांडसा हिल्ला मुरतळ मंदा पर्री, मुरतळ हिल्ला मांडसा मंदा पर्री.

12 बारित्ते, मुरतळ मांडसाताल तयार आता, अल्हेने मांडसा मुरतटाल पुटसेक मंतोर, गानि इवान्नि पेनदाले तयार आसेक मंता.

13 अय्ते, मिमेटे विचारम कीम्दु, मुरतळ तला मुचकुनवा पेनदा पारतना कियमळ बेसे ना?

14 मांडसा तल्लाता केल्ल बेर्सागोटकुनमळ ओनाहाटीं सिग्गु होनना पोल्ले आंद, इद मीक एरपाटे मंता.

15 गानि मुरतळ दाना केल्ल पोळगु बेर्सागोटकुल्ले दानकु कदर आंद. दाना तल्लातुन मुचकुनालय पेन दानकु केल्ल हीता.

16 इदुना बारेमते बोरन्ना लोल्लि कियानय्ते, ओनकु तेळियाना गदा, मावा इसोंटा रीति आयो, कलिसियातोरदगुडा इसोंटा रीति आयो.

पेनदा उपारम

17 मिमेट कलिसियाने जमा आयमळ पाय्दा आयो गानि नुकसाने आंता. अदुनहाटीं नना मीवा पेद्दातनम कीसेक हिल्लेन.

18 बस्के अय्ते मिमेट कलिसियाते जमा आंतिर, अस्के मीक वरोनद-वरोक अर्का अलग आसेक मंतिट इंचि नना मोदाला केंजतन, इदुन नना नम्मंतनगुडा.

19 मीलोप्पो अलग आयमळ बेसे. बारित्ते बोर निजमते पिस्संतोर, ओर दिस्सि अर्रंतोर.

20 मिमेट सामिना उपारम तिनालय जमा आंतिर, गानि अदुन सामिना उपारम इन्नुर.

21 बारित्ते मिमेट तिनानस्के वरोक मुन्ने वरोर, बोनद ओरे तितिर. अदुनहेंदाल बोरो कर्वुने मनंतुर, बोरो रिम्मांतुर.

22 मीक तिनालय-उनालय लोन हिल्लेना? हिलाकॉटे पेनदा कलिसियातोरकुन हय्साकुंटा आनि गरिबोर्कुना इज्जत पोगोटालय आतिरा? इंदके मीकुन नना बतल इनकन? इदुनाहाटीं मिमेट बेस कीतिर इनकना? बस्केने इन्नोन.

23 बारित्ते, सामिनाहेंदाल इव पोल्लें नाक दोर्कतां, अवुन नना मीक अप्पजेपतन. येसु सामिन बद रोज अय्ते पीसि हिय्याना मत्ता अद नर्का उंदि हारि एततोर,

24 पेनदुक दन्यवाद कीसि, हारितुन उराहतोर, उराहचि ओर्क हीसेक, “इद मीवाहाटी नावा मेंदुल आंद, नावा मतिताहाटी इल्हेने कीम्टु,” इंचि वेहतोर.

25 इल्हा अद तित्ता पजा, अंगुर पानकमता गिलास एतसि, “इद पानकम नावा नेत्तुरते पूना करार आंद, इदुन बस्के अय्ते उंटिर अस्के नावा मति कियाना,” इंचि वेहतोर.

26 बारित्ते, मिमेट बस्के-बस्के अय्ते इद हारितुन तित्तिर, अंगुर पानकम उंटिर, अस्के सामिना हामुरतुन ओर मल्सि वायानादाका वेहंतिर.

27 अदुनहाटी बोर अय्ते सामिक इस्टम हिल्वा रीतुने ताकसि, हारितुन तित्तोर, अंगुर पानकम उंटोर, ओर सामिना मेंदुल आनि नेत्तुरता दोस्सि आंतोर.

28 इंचि हरेक मनकल कुद बल्हा मंतोर इंचि ओनद ओर परिक्षा कीसि हळकुत्ता पजाने हारितुन तिनमळ गावाले आनि अंगुर पानकम उनमळ गावाले.

29 बारित्ते सामिना मेंदुल बारेमते तेल्लिचकुनाका तिनमळ-उनमळ कीते, ओर ओना पोर्ने सिक्सा तरकुंतोर.

30 अदुनहाटी मीलोप्पो वेल्लेटुर कमजोर आतुर, बिमार्क आतुर, वेल्लेटुर हासिगुडा होत्तुर.

31 गानि मनम कुद बल्हा मंतोम इंचि परिक्षा कीसि हळते, पेन मनाकु सिक्सा हिय्यो.

32 गानि मनाकु दुनियातोरतोनि सिक्सा आयामन्नि इंचि सामि मनाकुन बेस पोल्ले वेहचि सुदरांचतोर.

33 अदुनहाटी विस्वासुल्कुनिटा! सामिना उपारम तिनालय जमा आतस्के अंतोर वायानाल एदुर हळसि, कळसि तिट्टु.

34 बोरन्नागिंटा कर्वुने मत्ते लोने तिचि वायिर. इल्हा कलियमळता हेंदाल सिक्सा तपंता. कळमता पोल्लेन बारेमते नना वातस्के वेहंतन.

12

पवित्र आत्मा हिय्यना वरमकु

1 विस्वासुल्कुनिटा! आत्माता वराल्कुना बारेमते मीक तेळियका मनमळ नाक इस्टम हिल्ले.

2 मिमेट पेनदुन विस्वासम कियाका मुन्ने, वळ्ळका बोम्मान मोळ्ळकानाहाटी मीक बल्हा वेहते, मिमेट अल्हे तार्किदिर.

3 अदुनहाटी पेनदा आत्माते वळ्ळकानोर बोरे आयिर, “येसु सापनेम दलगतोर आंदुर,” इंचि इन्नुर. अल्हेने पवित्र आत्माते ताकवोर बोरे आयिर, “येसु सामि आंदुर,” इंचि इन्नुर.

4 वरमकु वेरे-वेरे मनना गानि पवित्र आत्मा उंदे आंद.

5 सेवागुडा वेरे-वेरे तीरकुना मनना गानि सामि वरोरे आंदुर.

6 वेरे-वेरे तीरकुना अद्बूतामाता कबाह्क मनना गानि ओरा लोप्पो कबाह्क कियालय दैरनेम हियना पेन उंदे आंद.

7 अंतोर विस्वासुल्कुंक पाय्दा आयागोम इंचि मा अव्टेताल हरेक मनकानगा पेनदा आत्मा हियमळ जर्गता.

8 बल्हा इत्ते, अदे आत्माताहेंदाल वरोर बुद्धिता पोल्ले वेहतोर, अदे आत्माताहेंदाल इंकावरोर तेल्विता पोल्ले वेहतोर.

9 अदे आत्माताहेंदाल वरोर विस्वासमते गट्टिगा मनंतोर, अदे आत्माताहेंदाल इंकावरोक बिमार्क बेस कियाना वरम हियमळ जर्गता.

10 अद आत्मा बोर्को-बोर्को अद्बूतामाता कबाह्क कियानद ताकत, बोर्को बविस्यवानि कियानद, बोर्को आत्मान लोप्पो तेडा बतल हळानद, बोर्को वेरे-वेरे बासां वळकानद आनि इंका बोर्को बासाना अर्तम वेहना वरम हीता.

11 गानि इवन्नि अद उंदे आत्मा दाना इस्टम वाताप वरोक-वरोक तूसि हीसि कबाह्कुन पूरा कीता.

मेंदुल उंदि, दाना बागाल्क वेल्लेने

12 मना मेंदुल उंदे गानि अवने बागाल्क वेरे-वेरे मंतां. अवन्नि बागाल्क वेल्लेने मनना गानि उंदे मेंदुलतव आंद, अल्हेने किरिस्तुगुडा मेंदुललेसी मंतोर.

13 बारित्ते, मनम अंतोरम यहुदिल्क आयिना, युनानि आयिना, दासुल्क आयिना, दासुल्क आयाकोन्ना उंदे आत्माहेंदाल, उंदे मेंदुल आयालय बापतिस्मा एततोम, मना अंतोर्क उंदे आत्मा उहमळ जर्गता.

14 अदुनहाटी मेंदुल्ले सिराप उंदे बागम हिल्ले गानि वेल्लेने बागाल्क मंतां.

15 ओक्कला, काल गिंटा, “नना कय आयोन, अदुनहाटीं मेंदुल्ला बागम आयोन,” इंचि इनकुनिना गानि अद मेंदुल्ला बागामे आंदु.

16 अल्लहेने केव गिंटा, “नना कळु आयोन, अदुनहाटीं मेंदुल्ला बागम आयोन,” इंचि इनकुनिना गानि अद मेंदुल्ला बागामे आंदु.

17 ओक्कला, पूरा मेंदुल कळे आसि मत्ते, बगाटाल केंजसि मन्नेम? पूरा मेंदुल केव्वे आसि मत्ते, बगाटाल मूस्किसि मन्नेम?

18 अदुनहाटीं पेन दाना इच्चा मत्ताप, हरेक बागमतुन मेंदुल्ले बगा-बगा इर्नो अगा इर्ता.

19 अव अन्नि गिंटा उंदे बागम मंचि मत्ते, मेंदुल बगा मनवळ?

20 अदुनहाटीं बागाल्क वेल्लेने मंतां, गानि मेंदुल उंदे आंदु.

21 इंदके कळु कय्दुन, “नीवातोनि नाक कबळ हिल्ले,” इंचि इना पर्री. आनि तला काल्कुन, “नीवातोनि नाक कबळ हिल्ले,” इंचि इना पर्री.

22 गानि मेंदुल्ले कमजोर मत्ताप दिस्सानव बागाल्के मनाकु वेल्ले अक्सरमतव आंदु.

23 मना मेंदुल्ले बव बागाल्कुनय्ते तक्को कदरतव इनकुंतोमो अवुने मनम एक्को कदर कीतोम, अव बव अय्ते सिंगारम हिल्वव अव इंका एक्को सिंगारम आंतां.

24-25 गानि मुन्नेटाले सिंगारम मत्ता बागाल्कुन सिंगारम कियाना अक्सरम हिल्ले, गानि बवय्ते बागाल्क कदर हिल्लेंगों अवुंक एक्को कदर दोर्कमळ गावाले. अव बागाल्क सिन्ना-पेद्दा बतल इनाका उंदांक-उंदि रंदि कियमळ गावाले, इंचि पेन इल्हा मेंदुल तयार कीता.

26 अदुनहाटीं ओक्कला मेंदुल्लतद उंदि बागम नोते, दानतोनि अव अन्नि बागाल्कुंक नोता. ओक्कला उंदि बागमकु कदर दोर्कते, अव अन्नि बागाल्क कूस आंतां.

27 अल्लहेने मिमेट अंटोर कलियसि किरिस्तुना मेंदुल आंदिर, हरेक मनकल आ मेंदुल्ला बागाल्क आंदिर.

28 कलिसियाता लोप्पो पेन मोदाला प्रेरितुल्कुन, ओरा पज्जो पेनदा कबुरतोर्कुन, ओरा पज्जो पेनदा पोल्लें कराहनोर्कुन, ओरा पज्जो अद्बूतामाता कबाहक कियानोर्कुन, ओरा पज्जो बिमार्कुन बेस कियानोर्कुन, ओरा पज्जो सहायम कियानोर्कुन, राज्येम ताकसानोर्कुन आनि वैरे-वैरे बासां वळ्कानोर्कुन निलाहता.

29 इत्ते, अंटोर प्रेरितुल्क आयुर, अंटोर पेनदा कबुरतोर आयुर, अंटोर पेनदा पोल्लें कराहनोर आयुर, अंटोर अद्बूतामाता कबाहक कियानोर आयुर,

30 अंटोर्क बिमार्क बेस कियाना वरम दोर्काहिल्ले, अंटोर वेरे-वेरे बासां वळ्ळकानोर आयुर, अंटोर अव पोल्लेना अर्तम वेहा पर्स्,

31 मिमेट पेद्दा-पेद्दा वराल्कुना आसेते मंटु, इवे आयाका इवुंकन्ना बेसता हर्रि वेहंतन.

13

पावरम कियमळ अन्निकन्ना बेस पोल्ले आंद

1 नना मनकालोर्क आनि पेनदा दूतां वळ्ळकना बासां वळ्ळकतेगुडा, नावा लोप्पो पावरम हिलाकोर्ते, नना टंग-टंग इनना इत्तोळतसंटोन हिलाकोर्ते गल-गल इनना गज्जेनसंटोन आंदुन.

2 नाक गिंटा बविस्स्यवानि वेहना वरम मनना, अन्नि मर्माल्कु आनि तेल्विता पोल्लें तेळियना, गुट्टान जर्पनच्चो पूरा विस्वासम मनना गानि नावा लोप्पो पावरम हिलाकोर्ते नना बतले कबळतोन आयोन.

3 नावा पूरा दनमतुन गिंटा गरिबोर्कुंक तूसि हिथ्यिना, बेसता कबुर वेहनाहाटीं नावा मेंदुल बोळ्ळसालय हिथ्यिना, नावा लोप्पो पावरम हिलाकोर्ते बतल पाय्दा मन्नो.

4 पावरमते ओप्के मंता, दया मंता. पावरम इंकावरोन पोर्रो कळ्ळ पोत्ता हिथ्यो, पावरम पोमाडेंगि किया हिथ्यो, पेद्दिदेरकेम किया हिथ्यो.

5 रीति हिल्ला कबाहक किया हिथ्यो, नाके पाय्दा गावाले इंचि इना हिथ्यो, सिडांचा हिथ्यो, बोर्नना तकलिपकु कियाना अदुन मनसुने इर्हा हिथ्यो.

6 कराब कबाहकुने कूस आया हिथ्यो, गानि सत्तेमते कूस आंता.

7 पावरम अन्नि पोल्लें सहन किया वेहंता, अन्नि पोल्लेनपोर्रो विस्वासम किया वेहंता. अन्नि पोल्लेनपोर्रो आसे इर्हा वेहंता, अन्नि पोल्लेने ओप्केते इर्हा.

8 पावरम बस्केने मारो. गानि बविस्स्यवानि वेहना वरम मारंता, वेरे-वेरे बासां वळ्ळकना वरम आगसि दांता, मर्मम तेल्विचकुनना तेल्वि मत्ते अदगुडा कबळ किय्यो.

9 बारित्ते मना तेल्वि पुरागा हिल्ले अल्हेने बविस्स्यवानि वेहना वरम पुरागा हिल्ले.

10 गानि बस्के अय्ते अन्निन पुरागा कियाना पोल्ले वायार, अस्के पुरागा हिल्वद मायसि दांता.

11 नना सिन्ना-पेडन मत्तस्के, सिन्ना-पेडनलेसीं वळकुंदुन, सिन्ना-पेडनलेसीं विचारम कियुंदुन, सिन्ना-पेडनलेसीं मनसु मत्ता, गानि पेद्दागा आतारिते सिन्ना-पेडनलेसीं वळकना पोळ्लें होळ्सीतन.

12 इंदके मनाकु अद्दमते हळताप मागुर-मागुर दिस्सेक मंता, गानि आयंका ओना मुन्ने नित्तिसि हळतोम. इंदके नाक पुरागा तेळियो, नावा बारेमते पेनदुक पुरागा तेळियंता. ओर वाता पजा, नाकगुडा पुरागा तेळियंता.

13 इंदके विस्वासम, आसे, पावरम इव मूड पोळ्लें बस्केळ्ळक मनानवे आंदुं, गानि इवेटाल पावरम अन्निकन्ना पेद्दा पोळ्ले आंद.

14

वेरे-वेरे बासां आनि बविस्वयानि

1 पावरम इद मीवा लक्से मन्निकांटी. आत्माता वराल्कुन पहकाटु, बविस्वयानि वेहना वरम पहकसेकेन मंटु.

2 बारित्ते, तेळियवा बासाते वळकानोर, ओर मनकालोर्कुनतोनि आयो गानि पेनतोनि वळकंतोर. ओर मर्ममता पोळ्लें पेनदा आत्माताल वळकंतोर, अव पोळ्लें मनकालोर्कुंक तेळियो.

3 गानि बविस्वयानि वेहानोर, मनकालोर्कुना बक्तितुन बेर्सागोटालय, दैरेनेम हियालय, सांतिते मनालय वेहतोर.

4 वेरे-वेरे बासाते वळकानोर, ओनदे बक्तितुन बेर्सागोटंतोर. गानि बविस्वयानि वेहानोर, कलिसियातोरा बक्तितुन बेर्सागोटंतोर.

5 मिमेट अंतोर वेरे-वेरे बासाते वळकगोम इंचि नना इनकुंतन. गानि दीनकन्ना एक्को बविस्वयानि वेहमळे बेस इंचि इनकुंतन. बारित्ते वेरे-वेरे बासाते वेहानोर, कलिसियातोर्कुन बक्तिते बेर्सागोटालय ओरा बासाते वेहाकॉटे बतल पायदा हिल्ले. अदुनहाटीं वेरे-वेरे बासाने वेहानदाकन्ना बविस्वयानि वेहमळे एक्को पायदातद आंद.

6 विस्वासुल्कुनिता! नना मिहगा वासि पेन नाक हीता पोळ्लेन वेहकन, तेल्विता पोळ्लेन वेहकन, बविस्वयानि वेहकन, कराहकन अस्के मीक पायदा आयार. अवुन होळसिसि वेरे-वेरे बासाते वेहते मीक बतल पायदा आयार?

7 अल्हेने तूरीला आनि तरास बुरीते जीवा हिल्ले. अय्नागानि अवुन बरोबर नेकिचाकॉटे, बतल नेकसेक मंता इंचि बल्हा तेळियंता?

8 तूताकोमता आवाज बरोबर पेय्साकॉटे लडाइ कियालय बोर तयार आंतुर?

9 अल्हेने मिमेटगुडा वेंरेतोक तेळियना पोल्लेते वेहाकॉटे, मीवा पोल्ले ओर्क बल्हा तेळियार? मिमेट वळिते वळकताप आंता.

10 दुनियाते बच्चुंगो तीरकुना बासां मंतां, गानि अर्तम हिल्वद बदे बासा हिल्ले.

11 अदुनहाटीं अद बासाता अर्तम नाक तेळियाकॉटे, नना वळकानोनतोनि वेंरे देसेमतोन आंतन, ओर नावाहाटीं वेंरे देसेमतोर आंतोर.

12 अल्हेने मिमेटगुडा पेनदा आत्माता वराल्कुने निडिस मंतिट, अबुनाहेंदाल कलिसियातोकुना बक्ति बेर्सना कोसिस कीम्टु.

13 अदुनहाटीं वेंरे-वेंरे बासाते वळकानोर, दाना अर्तम वेहाना ताकत हीम इंचि पारतना कियाना.

14 बारित्ते, ननागिंटा वेंरे-वेंरे बासाते पारतना कीते, नावा आत्मा पारतना कीता गानि नावा बुद्दिद कबळ किय्यो.

15 अय्ते नाक बतल कियमळ गावाले? नना नावा आत्माते पारतना कीतन, नना नावा बुद्दिदेतेगुडा पारतना कीतन. नना नावा आत्माते पाटा पारंतन, नना नावा बुद्दिदेतेगुडा पाटा पारंतन.

16 ओक्कला निमे सिराप आत्माते दन्यवाद कियानय्ते, नीवा पोल्ले तेळियवोर अगा उद्दुता मनकल आमीन इंचि बल्हा इनानुर? निमे बतल वळकतिन ओनकु तेळिया हिल्ले.

17 निमे अय्ते पेनदुक बेस दन्यवाद कीतिन, गानि इंकावरोना बक्ति बेर्सालय अद कबळ किय्यो.

18 मी अंतोर्कन्ना एक्को वेंरे-वेंरे बासाने वळकना वरम नाक मंता, अदुनहाटीं नना पेनदुक दन्यवाद कीतन.

19 गानि कलिसियातोकुनतोनि वेंरे-वेंरे बासाते पदि वेय्कुना पोल्लें वळकनदानकन्ना, ओर्क कराहलय तेळियना बासाते हेय्युं पोल्लें ना बुद्दिदेते वेहामळे नाक बेस.

20 विस्वासुल्कुनिटा! मिमेट तेल्विते सिन्ना-पिलाल्कुनालेसीं मनमट, गानि पेद्दा मनकालोर्कुनालेसीं मंटु. कराब पोल्लेने सिन्ना-पिलाल्कुनलेसीं तेळियवाप मंटु. विचारम कियमळते पेद्दोरालेसीं मंटु.

21 दर्मसास्त्रमते, “नना तेळियवा बासाने वळकानोर्कुना हेंदाल, पराया लोकल्कुना तोळदाल, ईरतोनि वळकंतन, अय्नागानि ईर नावां केंजुर,” इंचि पेन वेहंता.

22 अदुनहाटीं तेळियवा बासाते वळकमळ, विस्वासुल्कुनाहाटीं आयो,

गानि विस्वासम कियबोराहाटीं चिन्ह आंद. बविस्वयवानि वेहमळ विस्वासम कियबोराहाटीं आयो, गानि विस्वासम कीतोराहाटीं चिन्ह आंद.

23 ओक्कला कलिसियातोर उंदगा जमा आतस्के, अंटोर तेळियवा बासाते वळ्कालय दलगते, मीलोप्पो बासा तेळियवोर, अविस्वासि वायानय्ते, ओर मीकुन पागल आतुर इंचि इंतुर.

24 गानि मिमेटगिंटा तेळियना बासाते बविस्वयवानि वेहते, बोरन्ना विस्वासम कियवोर हिलाकोंटे तेळियवोर मनकल मिहगा वासि केंजते, ओना तप्पुक ओन्क तेळियसि, ओर पापमतुन एरपाट कीकुंतोर.

25 ओना मनसुने मक्किस् मत्तव पूरा दिसंतां. अदुनहाटीं ओर बोकबोर्ले अर्सि पेनदुन मोळ्कंतोर आनि “निजमे पेन मीलोप्पो मंता,” इंचि ओप्कुंतोर.

आरादना कियाना तरिका

26 विस्वासुल्कुनिटा! इंदके बतल कियाना? बस्के अय्ते मिमेट जमा आंतिर, अस्के वरोर पाटा पारालय, वरोर कराहलय, वरोर पेनदा पोल्ले बैयरा कीसि वेहालय, वरोर वेरे बासाते वळ्कालय, वरोर वेरे बासाता अर्तम वेहालय तयार मनंतुर. इवन्नि कलिसियातोरुंना बक्ति बेर्सनाहाटीं आयमळ गावाले.

27 वेरे-वेरे बासाते वळ्कना मते, इव्वुर हिलाकोंटे एक्कोते-एक्को मुव्वुर वरोन पजा वरोर वळ्किर आनि वरोर दाना अर्तम तेळियागोट्सि वेहिर.

28 गानि अर्तम तेळियागोट्सि वेहानोर गिंटा हिलाकोंटे, वेरे बासाते वळ्कना मनकल कलिसियाते चुपचाप मंचि ओना मनसुने पेनतोनि वळ्कना.

29 पेनदा कबुरतोर इव्वुर हिलाकोंटे मुव्वुरे वेहिर, कळमतोर वेहता पोल्लेन परिक्सा कीसि हळिर.

30 गानि उद्दिस् मत्तोरव्टेताल बोर्कन्ना अदे वेलाते पेनदा पोल्ले दोर्कसि अदुन वेहंतन इनकुनानय्ते, मुन्नेटाल वेहासेक मत्तोर चुपचाप उद्दना.

31 मिमेट अंटोर करियना, अंटोर सांतिते मंदना इंचि वरोर-वरोर बविस्वयवानि वेहा परांतिट.

32 पेनदा कबुरतोर ओरा आत्मातुन ओर इनकुत्ताप तिरहा परांतुर.

33 बारित्ते पेन गळबळ कियानद आयो, सांति हियना पेन आंद. अन्नि कलिसियाना पेनदा लोकुल्क इल्हे मनंतुर.

34 कलिसियातोर जमा आतस्के मुर्ताहक चुपचाप मंदना, बारित्ते अवुंक वळ्ळकना अदिकार हिल्ले. गानि कय हिळु मंदना आदेस मंता. इल्हा दर्मसास्त्रमतेगुडा रासि मंता.

35 अवुंक बतलन्ना करियना इच्चा मत्ते, लोन होत्ता पजा अव अवुना मुय्दुर्कुन पूसकियाना. बारित्ते कलिसियाते मुरतळ पूसकियमळ इत्ते सिग्गु होनना पोल्ले आंद.

36 बतल! पेनदा पोल्ले मिहगाटाले पेय्सतना? सिराप मिहागळ्ळे वाताना?

37 बोरन्नागिंटा, “नना पेनदा कबुरतोन” हिलाकॉटे, “नना पेनदा आत्मा मत्तोन” इंचि इनकुनानय्ते, नना मीक रासता पोल्लें सामिना आदेसाल्क आंदुं इंचि ओन्क तेळियाना.

38 गानि बोरन्नागिंटा इदुन ओप्कुनाकॉटे, ओनगुडा ओप्कुनमट.

39 अदुनहाटीं विस्वासुल्कुनिटा! बविस्यवानि वेहालय तयार मंदु, वेरे बासाते वेहेते ओन आपमट.

40 गानि अन्नि पोल्लें बेस उंदान पज्जो उंदि जर्गिकांटी.

15

किरिस्तु जीवाते तेदमळ

1 विस्वासुल्कुनिटा! नना मीक वेहता बेसता कबुरतुन मर्रा उंदि मल्का मति कीसि हीसेक मंतन. अद बेसता कबुरतुन ओप्कुत्तिर, अवने गट्टिगा निल्सिगुडा मंतिर.

2 नना वेहता बेसता कबुरतुन मिमेट होळसाकॉटा पीसि मत्ते पेन मीकुन पिसागोटंता. हिलाकॉटे मीवा विस्वासम कियमळ एर्तम आंता.

3 अदुनहाटीं अन्निकन्ना मुन्ने नहगा एवता पोल्लेतुने मिहगा एविस्तन. अद बतल इत्ते, दर्मसास्त्रमता पोल्ले मत्ताप, किरिस्तु मना पापाल्कुनाहाटीं हातोर,

4 बोंदा दोस्तुर, दर्मसास्त्रमते रासताप मूडो रोजुने जीवातेगुडा तेदतोर.☆

5 जीवाते तेदतस्के केपांक* दिसतोर, पजा पन्नेंडु प्रेरितुल्कुंक दिसतोर.

6 अद आता पजा, हेय्युं न्हकुंकन्ना एक्को विस्वासुल्कुंक उंदे मल्का दिसतोर. ओरागटाल वेल्लेटुर इदवेरदाकागुडा जीवाते मंतुर, गानि इच्चुर हातुर.

7 मर्रा याकोबुंक दिसतोर, दाना पजा अंतोर प्रेरितुल्कुंक दिसतोर.

8 नना नेलां निंडका मुन्नेन पुट्टोनलेसीं अंतोर्कन्ना आकिरते नाकुगुडा दिसतोर.

☆ 15:4 होसे 6:2 * 15:5 केपांक इत्ते पतरस आंदुर.

9 बारित्ते, नना अंटोर प्रेरितुल्कुन लोप्पो सिन्नोन आंदुन, नना पेनदा कलिसियातोकुंन तिप्पल्क कीतोन आंदुन. अदुनहाटीं प्रेरित इनना लायकगुडा हिल्लेन.

10 गानि इंदके बतलय्ते मंतानो, पेनदा कुर्पाहेंदाले मंतन. अद कुर्पा नाक एर्तम आयाहिल्ले. नना कळमता प्रेरितुल्कुंकन्ना एक्को कस्टम कीतन. अय्नागानि निजम इत्ते नना किया हिल्लेन, पेनदा कुर्पा नावातोन मत्ता, अदे कीता.

11 अदुनहाटीं नना पेनदा पोल्ले वेहना, ओर वेहना मोमोट अंटोरम उंदे पोल्ले वेहतोम. अदुन मिमेट विस्वासम कीतिर.

मनम जीवाते तेदमळ

12 किरिस्तु हातोरा लोप्पोटाल जीवाते तेदतोर इंचि मोमोट गिंगा कबुर वेहानय्ते, हातोरा मर्पा जीवाते तेदुर इंचि मीवा लोप्पोटोर इच्चुर इंतुर. अल्हा बारि इंतुर?

13 हातोरा मर्पा जीवाते तेदाकॉटे, किरिस्तुगुडा हासि जीवाते तेदा हिल्लोर.

14 किरिस्तु गिंगा जीवाते तेदाकॉटे, मोमोट वेहाना बेसता कबुर एर्तमे, मीवा विस्वासमगुडा एर्तमे आंद.

15 अचोने आयाका, किरिस्तु हातोरा लोप्पोटाल जीवाते तेदतोर इंचि मोमोट मीक वेहतोम. हातोरा गिंगा जीवाते तेदाकॉटे, पेन किरिस्तुनगुडा जीवाते तेहा हिल्ले इंचि तेळियंता. अदुना हेंदाल मोमोट पेनदा बारेमते आबदुदम गवाइ वेहताप आंता.

16 अल्हेने हातोरा गिंगा जीवाते तेदाकॉटे, किरिस्तुगुडा जीवाते तेदा हिल्लोर.

17 किरिस्तु गिंगा जीवाते तेदाकॉटे, मीवा विस्वासम एर्तम आंद आनि मिमेट इदवेरादाका पापमतेन पसांचि मंतिर.

18 अल्हा अय्ते, किरिस्तुन विस्वासम कीसि हातोरागुडा नासडेमताल पिसा पराहिल्लुर.

19 सिराप इद बूमिपोर्रोटा पिस्वरहाटीगे किरिस्तुनपोर्रो मना आसे इरते, मना गति अंटोर मनकालोकुंकन्ना एक्को गोसातद आयार.

20 गानि निजम बतल इत्ते, किरिस्तु हामुरताल जीवाते तेदतोर. बोर अय्ते विस्वासल्क हासि होतुर, ओरवेटाल जीवाते तेदतोर ओरे मुन्नेटोर आंदुर.

21 बल्हा अय्ते वरोर मनकनहेंदाल हामुर वाता, अल्हेने वरोर मनकनहेंदाल हातोरा मर्पा जीवाते तेदमळगुडा वाता.

22 बारित्ते, आदामुन लोप्पो अंटोर हासि दांतुर, किरिस्तुनलोप्पो अंटोर जीवाते तेहमळ जर्गार.

23 हरेक मनकल वरोन पजा वरोर, मोदाला किरिस्तु जीवाते तेदतोर, किरिस्तु मरी वाता पजा ओना लोकुलक जीवाते तेदांतुर.

24 अदुन पजा, पूरा सरकार, पूरा अदिकार आनि ताकत इव अन्निन किरिस्तु नासडेम कीसि पेनबाबाना कय्दे राज्येम अप्पजेप्पंतोर. अस्के बूमिता आकिर आथार.✧

25 बारित्ते, किरिस्तु ओना पगातोरकुन काल्कुना हिळु थायनादाका, ओर राज्येम कियमळ गावाले.

26 हामुर अन्निकन्ना आकिर पगातद आंद, अदुनगुडा नासडेम कीतोर.

27 बारित्ते, पेन अन्निन किरिस्तुना काल्कुना हिळु इरता. अन्निन इंचि इत्ते, पेनदुन होळसिसि अन्निन इंचि बरोबर एकां आंता.

28 अन्निन ओना अदिकारमते इरता पजा, पेन अन्निन ताकिचगोम इंचि मरि कुद दाना अदिकारमते आंतोर. बारित्ते पेने अन्निन ताकिचंता.

29 मरी जीवाते तेदाकोंटे, हातोरहाटी येसुना पोरोलते बापतिस्मा एततुर, ओर बतल कियानुर? हातोर गिंटा जीवाते तेदाकोंटे ओराहाटी बापतिस्मा बारि एताना?

30 बस्केळक मना जीवातुन बारि डेंजरते इराना?

31 विस्वासुल्कुनिटा! मिमेट मना सामि येसु किरिस्तुना लोप्पो विस्वासमते गाट्टिगा मत्ताहाटी, नना मीवा बारेमते पेद्दिदरकेम वेहकुंचेके मंतन. अदुनहाटीगे नावा हामुरतुन रोज हळसेक मंतन.

32 इपीसि सहरतगा, नना केडा जिवरासिनसोंटा मनकालोर्कुना रीतिते लडांचतन, अय्ते बतल पाय्दा आता? हातोर गिंटा तेदाकोंटे, दर्मसास्त्रमते रासि मत्ताप, “नाळि अय्ते हायानदे मंता, अदुनहाटी तिनकोम-उनकोम,” इंचि मन्नेम.✧

33 गानि हातोर मरी जीवाते अर्स् इंचि इनानोरा हेंदाल दोकाते अरमट. “कराब लोकुलकुना दंटा, बेस ताकानोर्कुन हेडहंता.”

34 अदुनहाटी नीतिते ताकसि उसारते मंडु, पापम कियमट. मीलोप्पो बच्चुटुरो पेनदुन एरपाट कियवोरगुडा मंतुर, मीक सिग्गु वायागोम इंचि इद पोल्ले वेहसेक मंतन.

जीवाते तेदता मेंदुल

35 गानि बोरन्ना, “हातोर जीवाते बल्हा तेदंतोर? जीवा अरता पजा मेंदुल बल्हा मंन्ता?” इंचि पूसकिया परांतुर.

36 ए बुद्धिद हिल्वोना! निमे बूमिते एदता पेळे, मुन्ने हासि, पजाटाल मोलियंता.

37 निमे एदतद, मोल्का आयो, पेळे आंद. अद गोहकुना पेळे आयावच्चु, इंका बदाना पेळे आयावच्चु.

38 गानि पेन दाना इच्चातीर दान्क रूपम हीता. वेरे-वेरे पेडेक, वेरे-वेरे रूपम हीता.

39 गानि अन्नि मेंदुल्क उंदेतीर मन्नो, मनकना मेंदुल वेरे, जिवरासिना मेंदुल वेरे, पिट्टेना मेंदुल वेरे, जिम्माना मेंदुल वेरे मंता.

40 स्वर्गमते मनानोर्क मेंदुल मनंता अल्हेने बूमिपोर्रो मनानोर्कगुडा मेंदुल मनंता. गानि स्वर्गमतोरा मेंदुल्ला वेल्लु वेरे, बूमि पोर्रोटोरा मेंदुल्ला वेल्लु वेरे मनंता.

41 पोळ्दुना वेल्लु वेरे, वेळिसता वेल्लु वेरे, सुक्काना वेल्लु वेरे. सुक्काना वेल्लु उंदानद-उंदांक परक मनंता.

42 हातोरा मर्रा जीवाते तेदमळगुडा इल्हे मंता. कळियसि होनना मेंदुल्लुन बूमिते दोसंतोम, गानि बस्केने कळियसि होनवा मेंदुल मर्रा जीवाते तेदंता.

43 मेंदुल बूमिते दोस्सनेके दाना कदर मन्नो, गानि अद मर्रा जीवाते तेदानेके दानकु वेरेने कदर दोर्कता. मेंदुल बूमिते दोस्सनेके दानकु ताकत मन्नो, गानि अद मर्रा जीवाते तेदानेके वेल्लेने ताकतते तेदंता.

44 बूमिते दोसतद मना दिस्सना मेंदुल आंदु, मर्रा जीवाते तेदानद आत्माता मेंदुल आंदु. अल्हेने दिस्सना मेंदुल मंता, आत्माता मेंदुल्लुगुडा मंता.

45 दर्मसास्त्रमते इदुना बारेमते, “मोट्टा मोदाटा जीवाता मनकल आदाम आतोरा” इंचि रासि मंता. आकिर आदाम, इत्ते किरिस्तु, पिस्वर हियना आत्मा आतोरा.

46 गानि आत्माता मेंदुल मोदाटद आयो, दिस्सना मेंदुले मोदाटद आंद. दाना पजाने आत्माता मेंदुल वांता.

47 मोदाटा मनकल बूमिता तोळिते तयार आतोरा, गानि पजाटाल वायाना मनकल स्वर्गमताल वातोरा.✧

48 तोळिताल तयार आतुर अंटोरा मनकालोर्क, तोळिता मनकनलेसीगे आतुर. स्वर्गमता मनकालोर्क, स्वर्गमतालेसीगे मंतुर.

49 मनम बल्हा अयते तोळिते तयार आतोना रूपम एततोम, अल्हेने स्वर्गमताल वायानोना रूपमगुडा एततोम.

50 विस्वासुल्कुनिटा! नना वेहानद बतल इत्ते, हव्वि, नेत्तुरता मेंदुल्क पेनदा राज्येम दोर्का पर्री, आनि कळियना मेंदुल्क, कळियवा मेंदुल्लगा अदिकार दोर्का पर्री.

51 केंजाट, नना मीक मर्ममता पोल्ले वेहसेक मंतन. अद बतल इत्ते, मनम अंतोरम हायोम, गानि मना रूपम मारियंता.

52 इदंता, उंदि सेकंदतेन, कळुरेप्पा तंतच्चोरजेमनेन जर्गता. आकिरता तूताकोम उहकुता उहकुळे, हातोर अंतोर बस्केने नासडेम आयाकोटा मननाहाटीं मर्रा जीवाते तेदानुर आनि मना रूपम बारे मारियंता.

53 बारित्ते, कळियसि होनना मेंदुल बस्केने कळियसि होनवा मेंदुललेसीं, आनि हायना मेंदुल बस्केने हायाकोटा मनना मेंदुललेसीं मारिया पीता.

54 बस्के अय्ते कळियसि होनना मेंदुल, कळियसि होनवा मेंदुल्ले मारियंता आनि हायाना मेंदुल हायवा मेंदुल्ले मारियंता, अस्के दर्मसास्त्रमते रासि मत्ताप, “पेन हामुरतुन मिंगसि वाटता” इंचि रासि मत्ता पोल्ले पूरा आंता.

55 “ए हामुरतुना! निमे माकुन बगा गेल्लिस्तन? ए हामुरतुना, नीवा कस्कना कौंडि बगा मंता?” इंचि रासि मंता.

56 हामुरता कौंडि पापम आंद, पापमता ताकत मूसाना नियम आंद.

57 मना सामि येसु किरिस्तुनाहेंदाल पेन मनाकुन गेल्लागोटंता. अदुनहाटीं पेनदुक दन्यवाद.

58 नावा पावरमगल्ला विस्वासुल्कुनिटा! सामिना लोप्पो मीवा कस्टम एर्तम होन्नो इंचि मीक एरपाटे मंता. अदुनहाटीं मिमेट विस्वासमते हीके-हेके आयाकुंटा, गट्टिगा निल्लि मंदु, सामिना कबळते इंका एक्को बेस्सेके होंटु.

16

येस्सलेमता कलिसियातोरहाटीं चंदा

1 येस्सलेमता पेनदा लोकुल्कुनाहाटीं चंदा जमा कियाना बारेमते, बल्हा अय्ते गलातिया एरियाता कलिसियातोरके वेहतानो, अल्हेने मिमेटगुडा कियाना.

2 नना वाता पजाने चंदा जमा कियमट, गानि मीववेटाल हरेक मनकल ओना कमाइता इसाबते वारमता मोदाटा रोज* इच्चुक कोत्तां जमा कीसि ईर्ट.

* 16:2 वारमता मोदाटा रोज इग्गे वारमता मोदाटा रोज इत्ते, अय्तराम.

3 नना वाता पजा, मिमेट बोर्कुनय्ते इद कबळताहाटीं पेरीतिरो, ओर्क नना सिट्टिं हीसि, ओरा कय्देने मिमेट जमा कीता चंदा येस्सलेम लोहचीतन.

4 ओक्कला नना होनमळ कुदुरते, ओर नावातोनि वांतुर.

पौलसना पय्नेम होनना विचारम

5 नाक मेसिडोनिया एरियाते होनना मंता, मेसिडोनियाताल पजा मिहगा वांतन.

6 मिहगा वासि, आया परते कोन्नि रोजकु हिलाकोंटे पूरा पीनि कालम मीवातोनि मनंतन. दाना पजा नाक बेके होनना मंता, हेके साला कीम्टु.

7 बारित्ते, मेसिडोनियाते होनानेके नड्डुम आगसि मीक कलियमळ नाक इस्टम हिल्ले. सामिना इच्चा मते, मीवातोनि कोन्नि रोजकु मंदना इंचि नावा आसे मंता.

8 गानि इंदके, पेंतेकोस्त पंडुगुनदाका इपीसि सहरतेन मनंतन.

9 बारित्ते, इगे बेसता कबळ कियालय, नाक उंदि पेद्दा मोका दोर्कता, इंका विरोद कियानोरगुडा वेल्लेटुरे मंतुर.

10 तिमोति मिहगा वातस्के ओर मीवा नड्डुम दैरनेमते मननाल हळट. ओरगुडा नावालेसीं सामिना सेवा कीसेक मंतोर.

11 अदुनहाटीं ओन बोरे सिन्नगा हळा मन्नि, ओन सांतिते नहगा लोहट. मिहगाटा विस्वासुल्कुनतोनि ओर वायानुर इंचि नना एदुर हळसेक मंतन.

12 अप्पुलोस दादान, विस्वासि दादालोर्कुनतोनि होन इंचि नना बच्चुंगो मल्कां बतिमलाडसि वेहतन, गानि इंदके मिहगा वायाना विचारम ओनद हिल्ले, पजा मोका दोर्कतस्के वायानुर.

13 इंदके मिमेट उसारते मंटु, विस्वासमते गट्टिगा मंटु, दैरनेमते मंटु, बलमगल्लोर्क आसि मंटु.

14 मिमेट कियाना कबाहक अन्नि पावरमतेन कीम्टु.

15 विस्वासुल्कुनिटा! स्टिपनसना लोतोर्कुना बारेमते मीक एरपाटे मंता, ओर अकाया एरियाते मोदाला विस्वासम कीतुर. ओर पेनदा लोकुल्कुना सेवा कियालय ओरद-ओर अप्पजेपकुत्तुर.

16 मिमेटगुडा असंटोरा आनि ओरालेसीं सेवा कियानोरा पोल्ले कैजसि ताकट इंचि बतिमलाडसंतन.

17 मिहागटाल मिमेट वायाकोन्ना गानि स्टिपनस, पुरतुनातुस, अकयकुस नहगा वातुर. ओर वाताहाटीं मिमेट वाताप आता. इंचि नना वेल्ले कूस आतन.

18 ओर वातुर इंचि नावा जीवक आनि मीवा जीवक सांति दोर्कता. अदुनहाटीं इसंटोर्कुन कदर हीम्टु.

आकिरता जोहर

19 आसिया राज्येमते मनना कलिसियातोर मीक जोहर वेहतुर. अकविला, ओना मुत्तो पिरिसकिला आनि ओरा लोतागा जमा आयाना कलिसियातोरगुडा सामिना पोरोलते मीक जोहर वेहतुर.

20 इगगेटा अंटोर विस्वासुल्क मीकुन जोहर कीसेक मंतुर. मिमेट वरोक-वरोर पवित्र पावरमते कलियसि जोहार वेहकुंट.

21 नना पौलुसुन, नावा कय्दे जोहर इंचि मीक रासेक मंतन.

22 बोरन्नागिंटा सामिन पावरम कियाकौंटा मत्ते, ओन्क सापनेम दल्गि. “मारानाता” इत्ते, मा सामि वा.

23 सामि येसुना कुर्पा मी तोळ मन्निकांटी.

24 येसु किरिस्तुना लोप्पोटा नावा पावरम मीवा अंटोरतोनि मंदना. आमेन.

Pavitra Polle
Aheri Gondi: Besta Kabur (Bible)

copyright © 2020-2022 Wycliffe Bible Translators, Inc.

Language: (Aheri Gondi)

Contributor: Wycliffe Bible Translators, Inc.

All rights reserved.

2025-05-01

PDF generated using Haiola and XeLaTeX on 1 May 2025 from source files
dated 1 May 2025

856c9a76-2de1-5675-855a-28be9a349068